




TAUSAGA 10



FAKASOLOGA O ULUTALA

VAEGA 1: KO TENA FANAU MAI:

Ulutala 1:	Ko te folafolaga ki a Malia	5
Ulutala 2:	Ko te folafolaga ki a Iosefa	6
Ulutala 3:	Ko te folafolaga ki tausi mamoe	8
Ulutala 4:	Ko te fanau mai o Iesu	10
Ulutala 5:	Ko te meaalofa a tino poto mai i te Sopogala	12
Ulutala 6:	Ko Iesu i te Faletapu	14

VAEGA 2: FAKATOKAGA MO TENA KALAGAGINA:

Ulutala 7:	Ko te tino fakatoka—Ioane te Papatiso	16
Ulutala 8:	Ko te Papatisoga o Iesu	18
Ulutala 9:	Ko te fakalilikikiga o Iesu	19
Ulutala 10:	Ko te fakaosoosoga o Muamua o Iesu	21
Ulutala 11:	Ko te lua o fakaosoosoga	22
Ulutala 12:	Ko te fakaosoosoga i te tolu	24

VAEGA 3: KO PUAPUAGA MO TE SATAULO O KELISO:

Ulutala 13:	Ko Ulumanumalo a Iesu ki loto I Ielusalema	25
Ulutala 14:	Ko faka'ma ne Iesu a te Faletapu	27
Ulutala 15:	Ko te toe 'kaiga a te Alike	28
Ulutala 16:	Iesu i te fatoaga o Ketesemane	30
Ulutala 17:	Ko te fakalataga o Iesu	31
Ulutala 18:	Ko te fakamasinoga o Iesu	33
Ulutala 19:	Ko te fakasalaga o Iesu	34

VAEGA 4: KO TE MATE MO TE TOETU MANUMALO O IESU:

Ulutala 20:	Ko valoaga a Iesu mo tena toetu mai	36
Ulutala 21:	Ko te tanuga mo te tausiga o te tanu	37
Ulutala 22:	Ko mea ne tupu i te taimi ne mate ei a Iesu	38
Ulutala 23:	Ko fakaasi atu a Iesu ki a Malia te Makatala	40
Ulutala 24:	Ko fakaasi atu a Iesu ki te tinoagafulu mo te tokotasi	41
Ulutala 25:	Ko fakaasi atu a Iesu ki a Toma	42
Ulutala 26:	Ko fakaasi atu a Iesu ki a Petelu	44
Ulutala 27:	Ko fakaasi atu a Iesu ki te tokolua i te Auala ki Emau	45

**VAEGA 5: KO FANAKE A IESU KI TE LAGI MO TE GALUEGA
FAKATONUTONU:**

Ulutala 28: Akoako kae papatiso a tino katoa	46
Ulutala 29: Fakaasiga o te malosi o te Atua	47
Ulutala 30: Ko fanake a Iesu ki te lagi	49

VAEGA 6: KO ASO FAKAMANATU

Ulutala 31: Ko te Aso o te Tala'lei	50
Ulutala 32: Ko te Aso o 'Matua	51
Ulutala 33: Ko te Aso o Tamana	53
Ulutala 34: Ko te Aso o Talavou	55

TUSI AKOGA ASOTAPU MÔ TE TAUSAGA 10
TUSI MÔ FAIAKOGA

Ne fakatokagina a te Tusi Akoga tenei mai loto i te Ulu Ofisa o te Ekalesia Kelisiano Tuvalu i Funafuti mai lalo o te Matagaluega o Talai mo Akoakoga Faka-Kelisiano

A mataupu konei ne fakatoka katoa mai lalo o te akoakoga fakamasani mô te kalikulamu fou tela ne faigina ne tena 'Malu, Faifeau Tokita ko Arun Gopal mai i Initia ki Saute.

Te fakamoemoega maluga ke aogã a te tusi tenei mô tatou faiakoga e fesoasoani mai ki te fakatokaga o 'tou mataupu mô te fagaiga o agaga o fanau gasolo o 'tou Ekalesia kae maise 'tou Atufenua. Te faitu tãua e 'se ko te tauloto fua mai loto i te tusi tenei, kae ko te fakaaogaga o te Tusitapu, faitau faka'lei ki ei kae ko fesoasoani atu ei a fakatokãga konei ko te mea ke faka-atili mäina ei a tena Muna.

Fai'tau a te Muna a te Atua. Fai talosaga mô tena Agaga Tapu kae fakalagolago ki tena poto mo tena malosi e mafai ei ne tatou o fakatino a 'tou tusaga tãua konei e tautua atu ei tatou ki te Atua. A te kalagagina o tatou faka-faiakoga e se se kalaga fãtauvã, kae se tiute fakatino o akoako atu a te Muna a te Atua ki ana meaalofa mô te Ekalesia, kola ko fanau gasolo o 'tou Ekalesia. Ke fakamanuia atu a te Atua ki aulua galuega kae maise ko oulua olaga tautua i loto i tena Galuega.

Ke masaua ne koulua faiakoga me tafasili atu a te mafa te taa fakamasinoga ilo niisi (Iakopo 3:1)

Ke fakamanuia atu a te Atua ki aulua galuega kae maise ko oulua olaga tautua i loto i tena Galuega.

MANATU FAKAVAE – KILO KI A IESU

VAEGA 1 – KO TENA FANAU MAI

ULUTALA 1: KO TE FOLAFOLĀGA KI A MALIA

Pogai: Ke akoako a tamaliki ke iloa ne latou a te fanaumaiga o Iesu fakatasi foki mo tena tupuakega.

Tusi Faitau: Luka 1:26–38

Fakatokāga mô Faia’koga:

Mai tua ote ono masina ne fakaasi atu iei a Kapilielu kia Sakalia, ako Elisapeta e faitama iei, ako ono ana masina. Ne oko foki tefakaasiga mai ite agelu ko Kapilielu kia Malia ite fakai o Nasaleta, i Kalilaia. A Malia, tela se taupou kae ko nofo nei mo Iosefa. Iosefa se tino mai ite gafa o Tavita. Aia se kapenita kae ne fakatonugina aia ne te Aliko i tena miti, ke fai ne ia a Malia mo fai tena avaga.

Te agelu tela ne vau mote fekau kia Malia, ne seki ifo kia ia, kae ne fakatalofa atu fua kia Malia. Ne fai atu kiei te agelu, ia ia ko oti ne fili-filigina ke fai mo matua ote Fakaola.

Lesona:

Mai tua ote ono masina ne fakaasi atu iei a Kapilielu kia Sakalia, ako Elisapeta e faitama iei, ako ono ana masina.

Ne oko foki tefakaasiga mai ite agelu ko Kapilielu kia Malia ite fakai o Nasaleta, i Kalilaia. A Malia, tela se taupou kae ko nofo nei mo Iosefa. Iosefa se tino mai ite gafa o Tavita. Aia se kapenita kae ne fakatonugina aia ne te Aliko i tena miti, ke fai ne ia a Malia mo fai tena avaga.

Te agelu tela ne vau mote fekau kia Malia, ne seki ifo kia ia, kae ne fakatalofa atu fua kia Malia. Ne fai atu kiei te agelu, ia ia ko oti ne fili-filigina ke fai mo matua ote Fakaola.

Mea a’koga mo fakamāina ei a te mataupu:

- Ata #51

Vitio kaseti (mafai e isi e toka)

Fakatomuaga:

Mata e isi se tino ne vau ki te lalolagi nei i se auala fakaatea me ko tatou

ne fanau katoa mai ne `tou matua? Te mea e `kese iei a Iesu, me koi tuai a ia o fanau mai kae e isi ne fakaasiga io me ne fakailoaga ne oko mai ki ona matua.

Akoakoga:

Tamaliki, a te fanau mai o Iesu, e `pau eiloa mo te fanaumaiga o tatou katoa mai `tou matua, kae e `kese fua me ona koi tuai a ia o fanau mai, kae ko oti ne fakailoa ne te avefekau a te Atua ki a Malia me ka fanau mai ne ia a te Fakaola. Ne filifiligina a Malia ne te Atua kae ne fakaoko mai a tena fekau e auala i te agelu. Te mea taua ke iloa ne tatou i konei, me i te Atua e pule ia tatou, e iloa foki ne ia a mea kola e fai ne tatou. Ona la ko Malia, se fafine e `gali ona uiga, kae fai foki ne ia a te loto o te Atua, tela ne filifiligina ei a ia ne te Atua ke fai mo matua o Iesu, te Fakaola o te lalolagi. Kae ne tupu ake foki a Iesu, ne tausi faka`lei ne ia, ne putiputi ake ne ia ke oko eiloa ki tena matua. A tatou foki e mafai o filifiligina ne te Atua ke fai ne tatou ne tusaga lasi kae taua mô ia manafai e ola tatou o fai tena finagalo i `tou olaga.

Mea fai a Tamaliki:

- `Kala fakagaligali a te ata #51
Tauloto ke `mau faka`lei a te fuaiupu tauloto

Pese: Ne nonofo i te vao leoleo mamoe (fili ite tusi pese)

Fuaiupu Tauloto: Luka 1:31 "Kiloke, a koe ka faitama, ka fanau ne koe se tama tagata, kae ka fakaigoa ne koe a ia, ko Iesu."

Talosaga:

Te Atua te motou Tamana alofa, fakafetai kooti ne fakalogologo matou i tala ote fanaumaiga mo te tupuakega o Iesu, te motou Fakaola. Akoako mai matou, ke kilo atu matou ki a koe Iesu te Fakaola o matou, kae ke ola matou o fai te mea tela e loto koe ki ei. Amene.

ULUTALA 2: KO TE FOLAFOLĀGA KI A IOSEFA

Pogai: Ke akaoako a tamaliki ke iloa ne latou me ia Iosefa ne kala-gagina ne te Atua ke fai mo tamana o Iesu.

Tusi Faitau: Mataio 1:18–25

Fakatokāga mô Faia'koga:

A Iosefa ko te tamaliki a Iakopo (Mata.1:16), ne vau mai te gafa o Tavita (Mata.1:20) kae se tagata e matakū ki te Atua (Mata.1:19). A Iosefa ne avaga ki a Malia ako la tama ko Iesu, Iakopo, Iosefa, Simiona, mo Iuta; kae e isi foki ne olotou tuagane (Mata.13:55-56). A Iosefa ko te tamana o Iesu (Luka.4:22; Ioa.1:45; 6:42).

E isi se fakasalaga e mafai o oko ki se tamafine tela e fai feagaiga ke avaga kae moe mo te sua tagata mai lalo o tulafono faka-Iutaia (Teu.22:23-24). A Malia e seki moe mo se isi tagata tenei ne faitama i ei; a ko Iosefa ne manako o lepe malie tela feagaiga mo Malia me ko faitama, kae e se iloa ne ia me ne faitama i ai. Fakamuli ifo ne maina lei a ia e uiga mo te mea ko tupu i te fakaasiga tela ne fakaoko atu ki a ia i te moemiti, tela ne avaga ei a laua.

A Mataio (1:18-25) mo Luka (1:26-56; 2:1-38) e kesekese a tala a laua e uiga ki te fanau mai o Iesu kae ko laua foki loa konei ne avake ne laua te tulaga "tamafine" o Malia. A Malia ne talia ne ia te fekau a te Atua i tona talitonu i a ia se tavini a te Aliko (Luka.1:38).

Ne fakafetaui ne Elisapeta a tena kaiga ko Malia ki muna faka-amutia penei: "Amutia koe i fafine katoa" (Luka.1:42). Ne ave ne ia a tena tama ki te faletapu kae ne fakamaonia ne Ana mo Simiona a te fanau mai o te Mesia kae ne 'tao atu mo tena muna ki a Malia penei: "A tou fanoanoa ka fakatusa ki se pelu mata kai, ka suki ne ia a tou loto" (Luka.2:35).

Lesona:

Te fanau mai o Iesu e kese mai i te fanau o tino katoa. Malia ko filigina me ka fanau mai ne ia Iesu, te Fakaola. Kae ko ia ka faitama ite agaga tapu. E fakafoofogina te tulaga tenei, kae ne faigata foki kia Iosefa ona me ese malamalama ite fakasiga tenei ne oko kia Malia. On ko tu mo faifaiga, tela ne faigata iei o talia ne Iosefa, kae ne mafaufau ke mavae laua mo Malia. I taimi tonu e iloa tenei, ne oko mai iei te fakasiga ate Aliko kia Iosefa ke avaga ne ia a Malia, me ko faitama ite agaga tapu, kae ka fanau ne ia te tama tagata, kae ka fakaigoa kia Iesu, me ka fakaola ne ia a tino katoa. Malia ne matakū, kae ne fakamalosiaina ne te agelu, kese matakū, me ko oti ne filifiligina aia mai i loto ite tokoukega o fafine.

Mea a'koga mo fakamāina ei a te mataupu:

Ata #53

Fakatomuaga:

Tamaliki, koutou e isi katoa ne outou tamana. Ia kae nei, koutou ka

fakalogologo ki te tala o te tamana o Iesu tela ko Iosefa.

Akoakoga:

A Iosefa ne kalagagina ne te Atua ke fai a ia mo avaga a Malia, me ia Malia ka fanau mai ne ia se tamaliki tagata, kae ke fakaigoa ne laua ki a Iesu, me ka fakaola ne ia a tino katoa mai i olotou agasala. E lua a akoakoga tãua e maua ne tatou i te tala o te taeao nei:

1. Ko te filifiliga a te Atua
2. Ko te fakalogo o Iosefa

A tatou taki tokotasi, e filifiligina katoa ne te Atua i `tou olaga ke fai ne tatou ne tusaga tãua mô ia i te lalolagi nei, kae manakogina la iei ko tatou ke faka'logo ki te Atua o fai tena finagalo pela mo Iosefa.

Mea fai a Tamaliki:

- Tauloto a te Fuaiupu Tauloto
- Faifesili mo tamaliki ki fesili kola e autu tonu ki te ulutala o te aso nei
Fakafesili ki tamaliki taki tokotasi me mata la nei seâ a te finagalo o te Atua mô latou?

Pese: When the Saviour calls (fili I te tusi pese)

Fuaiupu Tauloto: Mataio 1:20"Iosefa te mokopuna o Tavita, sa matakou o fai Malia mo fai tau avaga, i te mea ko faitama i te Agaga Tapu".

Talosaga:

Fakafetai lasi te Atua alofa mo `tou alofa tumau mo matou, kae maise ko te tuku mai ne koe o tau tama fagasele ke mate mo omotou agasala ke fakamagalogina. Fakamanuia mai mo matou ke fai matou mo tamaliki e ola talitonu ki a koe i aso katoa o motou olaga, ona ko Iesu. Amene.

ULUTALA 3: KO TE FOLAFOLĀGA KI TAUSI MAMOE

Pogai: Ke fakamatala ki tamaliki me ne fakaasi foki ne agelu ki tausimamoe i te vao me ko fanau mai a te Iesu, te Fakaola o te lalolagi.

Tusi Faitau: Luka 2:8-20

Fakatokāga mô Faia'koga:

A tausi mamoe o Palesitaina e fakatulaga me ne tino mativa, e nofo ki te taki selau a olotou mamoe e tausi. Te mamoe se manu e lauiloa a tona aoga i fenua konei ona me maua i ei a olotou sene; e fakaaoga a olotou fulufulu mo faite a gatu moko, ako susu e fakaaoga mo inu, mo fai foki a meakai. A pakili e fakaaoga mo faite a taka mo gatu ako kano mo kai, ako sinu e fakaaoga mo fai a nisi meakai. I te sua faitu, a tausi mamoe e galue malosi o sala a koga mo fagai kae fainu a olotou manu, ona mene koga lavaki kae se ola lei a mouku me se uke a vai. Te galuega faigata a tausi mamoe ko te tausi fakalei a olotou mamoe mai i manu fekai mo tino kaisoa fakatasi i ei mo te tau moko. A te galo o se mamoe e tasi se matua mea faka-fanoanoa ki te tausi mamoe.

A te uiga o te muna 'Agelu' i te gana Eleni se "faifekau". Te agelu ko te faifekau faka te agaga a te Atua. E pela mo tala i Pateleake (Kene.16:7-14; 19:1-22; 22:11, 15-18) ke oko ki fekau ki nisi tino (Eso.3:2; 23:20-23; 33:2; Fama.13:3-5; 1Tupu.19:5-7; 2Tupu.19:35; Isa.37:36). A faifekau konei e seai ne foitino o latou kae e foliga pela mene tino i nisi taimi.

A agelu e uke a olotou galuega, e viki ki te Atua (Sala.103:20; ko faifekau a te Atua ki te lalolagi (Luka.1:11-20, 26-38; 2:9-14), e onoono kae tausi ki tino o te Atua (Sala.91:11-12), e fakaaoga foki i nisi taimi ke fakaoko ne latou te fakamasinoga a te Atua (Mata.13:49-50).

Lesona:

A tausi mamoe e nofo ite vao, ite po kae fakaasi atu te agelu mo te fekau kia latou me ko fanau te Pepe o Peteleema ite fakai o Tavita. Te agelu, ko te avefekau ate Atua. Ite mataupu silisili, a Iesu kote Fakaola, ko ia foki ko te Keliso, te Atua Fauu kae fakatapu, ko te Mesia. A Ia foki ko te Aliko. Muna te agelu, ka maua atu ne koutou te tamaliki e pulupulu ki laugatu, kae e fakamoe aia i loto ite tali fagai manu.

Mea a'koga mo fakamāina ei a te mataupu:

Ata 55

Fakatomuaga:

Kafai a te po ko pouli aka loa kae 'nofo tatou i te vao, kae sae fakavave mai se mainaga pula kae lasi, mata tatou e poi kae ma'taku?

Akoakoga:

A fakaasiga katoa konei ne 'tupu, ne mea katoa e molimau mai ne latou a te 'kese mo te 'malu o te tamaliki tenei ka fanau mai. Ko 'kese mai fanaumaiga o tino katoa kola ne fanau mai mua o Iesu, kae ke oko foki loa ki aso nei, seki ai loa se tino ne fanau mai ke isi ne fakaasiga pela mo fakaasiga konei ne 'tupu i te taimi ne fanau mai ei a Iesu. A tausi mamoe kaati ne 'poi katoa kae matakū me sea la a te mainaga lasi tenei ko maina mai luga o latou. Ne 'poi foki me ko sae mai a te agelu o folafola mai a te Tala 'Lei ki a latou e uiga mo Iesu. Tamaliki, a te Tala ne aumai ne agelu ki tausi mamoe, e tenei e iloa koi tumau a tena folafola mai ke oko ki te taeao nei; ***ko fanau mai a te Keliso te Aliko ko Iesu***, ea, kai talitonu e iloa tatou me ia Iesu ko te Keliso, te Aliko mo te Fakaola o tatou? Ke na talia ne tatou a ia ki 'tou olaga i te taeao nei ke vau a ia o fai mo Aliko tumau o 'tou olaga i aso katoa.

Mea fai a Tamaliki:

- 'Kala fakagaligali a te ata #55
Tauloto a te fuaiupu tauloto ke maua faka'lei

Pese: Ne nonofo i te vao leoleo mamoe..... (fili I te tusi pese)

Fuaiupu Tauloto: Luka 2:10,11 "Sa ma'taku, kiloke ko aumai ne au a te 'lei mo koutou, ka fakafiafia ei a tino katoa. I te po e iloa tenei i te fa'kai o Tavita, ko fanau ei te outou Fakaola ko Keliso te Aliko "

Talosaga:

Te Atua te motou Tamana alofa, fiafia omotou loto i tou alofa mo matou. Ko fakaasi mai ne koe ki a matou a te fanau mai o tau tama pele ko Iesu, tela ko te motou Fakaola. Fakamalosi mai matou ke iloa ne matou o a'lofa ki a koe i aso katoa o motou olaga. Amene.

ULUTALA 4: KO TE FANAU MAI O IESU

Pogai: Ke akoako a tamaliki ke māina i te 'tala o te fanau mai o Iesu.

Tusi Faitau: Luka 2:1-7

Fakatokāga mô Faia'koga:

Te tusiga igoa (census) te la ne fakatonu ne Kaisala Aokuso kae ko Kullenio ko te kovana o Sulia e fakapatonu kae fakamailoga i ei a te taimi

(date) ne fanau i ei a Iesu. Ko tona uiga, i loto i gasologa o tala tuku fakasolopito o te lalolagi, ne gaki mai i ei a te Atua mo ana fuafuaga, mo tena palani fakaola ke faka-galue mo tino o te lalolagi. A Iosefa ko te tamaliki a Iakopo (Mata.1:16), ne vau mai te gafa o Tavita (Mata.1:20) kae se tagata e matakū ki te Atua (Mata.1:19). A Iosefa ne avaga ki a Malia ako la tama ko Iesu, Iakopo, Iosefa, Simiona, mo Iuta; kae e isi foki ne olotou tuagane (Mata.13:55-56). A Iosefa ko te tamana o Iesu (Luka.4:22; Ioa.1:45; 6:42). " ... fakamoe i te tali fagai manu, me ko seai se koga mo latou i te faletalimalo" te ata o te tavini loto malalo kae 'e se kai filifili' me seai i a ia te loto fia sili kae ko te loto alofa mo tino katoa.

Lesona:

Ne fakatonu ne Kaisala Aokuso ke fai te tusiga igoa i fakai o tupuga o latou. Ko Kulene i ei te kovana o Sulia. Kaisala Aokuso ne pulepule mai ite 27 TMK ke oko ki te 14 TMTK. A Iosefa mo Malia ne aumai kite tusiga igoa, kae ko te taimi tonu foki e iloa ne fanau iei a Malia. Ko te fakataunuga o te valoaga nefai ne te pelofeta ko Mika 5:2 Muna ate Aliko "Peteleema Efalata, a koe se fakai e tasi mai fakai foliki e iloa o Iuta, kae ka avaka ne au mai i a koe se pule mo Isalaelu, ko tena gafa e vau mai aso mua e iloa." I te okomaiga ki Peteleema, ko fonu te fale talimalo, kae ko seai se koga mo n ofo. Na ko te fale o manu fua e avanoa. Iesu ne fanau iloto ite fale o manu, kae ne fakamoe i loto ite tali fagai manu.

Mea a'koga mo fakamāina ei a te mataupu:

Ata #54

Fakatomuaga: Kai isi aka loa se tamaliki i Tuvalu nei ne fanau i loto i se pamoā, pa-taki io me se saipuaka?

Akoakoga:

A te fanau mai o se pepe ki loto i se kaiga, se fakafiafiaga lasi ki loa ki matua mo kaiga o te pepe kae maise ko te tamaliki muamua loa tela ko te ulumatua. A matua e masani o fakatoka saale ne laua a kope o te pepe pela mo pitaake, ko te tiisi kōukou ko te fagu susu mo niisi mea aka foki. Amutia tatou kola ne fanau i te fakaimasaki io me i loto i se fale gali kae mafanafana, kae fai mai a te Tusitapu, me ia Iesu ne fanau fua i loto i te fale e tasi ei a manu pela mo pulumakau mo kouti mo mamoe, ona me ko seai se avanoaga mo latou i loto i fale talimalo. Tamaliki, a te fanau mai o Iesu i loto i te fale manu se fakaasiga o te auala o te loto

maulalo kae se ko te fiamaluga mo te fiasili. Tela la, ke fakaakoako tatou ki te Alike ke ola tatou i se olaga loto maulalo mo te alofa.

Mea fai a Tamaliki:

`Kala a te ata #54.

Fai a fesili mo atili fakamāina ei a te tala o te taeao nei.

Pese: "Ko fanau mai te pepe...." (fili I te tusi pese)

Fuaiupu Tauloto: Mataio 5:5 "Amutia a latou kola e loto malalo me fai ma latou a folafolaga a te Atua."

Talosaga:

Te Atua te motou Tamana alofa, fakafetai mo te fakaasi mai ne koe se ata fakaakoako ki a matou, ko te mea ke ola matou i te loto maulalo. Fesoasoani mai ke mafai ne matou o ola i loto i tou finagalo. Amene.

ULUTALA 5: KO MEAALOFA A TINO POTO MAI I TE SOPOGALA

Pogai: Ke fakamaina ki tamaliki, me i te fai meaalofa ki te pepe ko Iesu, se faifaiga e fakamalosi ne ia a te fai mealofa o tatou ki te Atua.

Tusi Faitau: Mataio 2:1-12

Fakatokāga mô Faia'koga:

Peteleema (te Fale o Falaoa) se fakai foliki tela e lima maila ki te feitu ki Saute o Ielusalema, kae e tusa mo te 750 meter te maluga mai i te levolo o te tai. Tenei te fakai o Tavita mo ana matua (1Samu.16:1; 17:12). Ne takutakua malosi te fakai tenei mene fanau mai i ei a Iesu (Mika.5:2; Mata.2; Luka.2; Ioa.7:42).

A Helota te Sili (Herod the Great) ko 'te tupu o tino Iutaia' i te taimi ne fanau ei a Iesu kae a ia ne mate foki loa i te tausaga foki loa tena i te 4 B.C. Ko Helota tenei ne faite ne ia te Faletapu i Ielusalema tela ne kamata i te 20 B.C kae ne oti lei i te A.D.62 ka ko leva ne mate i ei a ia.

A Helota te Sili ne sui ne tena tama ko Helota Anitipa (4 B.C-A.D.39) tela ne feagai mo Ioane te Papapitiso mo Iesu (Mata.14:1-12; Male.6:14-29; Luka.3:19-20; 9:7-9; Male.8:15; Luka.13:31-32; 23:6-16; Galu.4:27). A tena tulaga ne fakase ne tona fiafai ki a Helotia tela e fakatamana ki a ia, kae avaga mo tena taina ko Helota tela e matua kesekeke laua. Ona ko

tena manakoga tena, ne mavae ei a ia mo tena avaga, kae avaga mo Helotia. A Ioane te Papatiso ne fakaasi ne ia a tona se fiafia ki tona uiga tena, tela ne pei i ei ne ia a Ioane ki te falepuipui kae fakamuli ifo ne kati a tona ua i te manakoga o Helotia (Mata.14:1-12; Male.6:14-29; Luka.3:19-20; 9:7-9). Ko Helota foki loa tenei ne fakamasino ne ia a Iesu (Luka.23:6-16; Galu.4:27).

A tino Poto mai te Sopogala i te gana Eleni 'Magi' e fakauiga ki tino fakataulaitu; kae i a Mataio (2:1) e fai mene aumai mai te Sopogala kola ko fenua faka Alapi mo Mesopotamia. A tino Poto konei ne poto i mea tau fetu me tela e takitaki ne te fetu (2:2) kae ne tino o fenua fakatea me e 'se iloa ne latou a muna a pelofeta e uiga mo te koga ka fanau mai o Iesu (2:2-6). Ona me tolu a meaalofa (2:11) ne tuku ki a Iesu, ko tuku taumate ei me tokotolu a tino Poto mai te Sopogala, ka ko latou kona ne tupu e pela mo te molimau a Isaia (60:3).

Lesona:

I te vaitaimi tenei, ko taimi o te tupu ko Helota. Ne logo te tupu ite Keliso ko fanau mai, kae ne lamalama ne Helota ke tamate neia Iesu ka ko nofo iei a Malia mo Iosefa mo te pepe i te sfale o manu. A Helota ne vau ite gafa o Esau, tela e fai fili mo tekau Iutaia. Ko pilipili ki te oti o tena nofoaiga, kae ne malaga mai iei a tino poto mai ite Sopogala o sala ate Tupu ote kau Iutaia. Ona ko te tulaga atamai o latou, tela e filifiligina sale faeloa latou ke ola o faipati ki te tupu. I te malaga o olo o sala te Tupu, e lavea ne latou te fetu pula, ka mai ite lotou maina i fetu, mote faitau foki ki tusitusiga fakapelofeta, e iloa ne latou o fakamatata te uiga o te fetu pula, me ko te fetu o te Tupu. Ne taki latou ne te fetu ki te koga tela e fanau iei ate Pepe. Ne lafo olotou meaalofa kite Pepe o Petel-eema, te Fakaola o tino katoa.

Mea a'koga mo fakamāina ei a te mataupu:

- Ata #57
Niisi ata mafai e isi

Fakatomuaga:

Kaiā e ave saale ei a meaalofa a tino ki pepe io me ko taimi o asofanau?

Akoakoga:

A tagata poto konei mai i te sopoga'la ne faimalaga mai o 'sala, o faimeaalofa kae o tapuaki ki te Aliko, te Fakaola tela ne lavea ne latou a tona fetu fakatino. Ne mai latou mo te mautinoa mo te loto tali'tonu ko latou

ke oko ki te fale e fanau ei a te Alikī. E `pau eiloa mo tatou i aso nei, e lavea ne tatou a tino e fai meaalofa saale foki ki tamaliki foliki mo tino kola ko fai olotou asofanau, mea nei ne fakaasiga katoa o te a`lofa mo te amanaia ne tatou a te tino tela io ia a te asofanau. A te fanau mai o Iesu se meaalofa tena a te Atua te Tamana mō tatou tino katoa, ne tuku mai tena ola ke mate a ia mō `tou agasala ke fakamagalogina. Seâ la nei a `tou tali ka tali atu ki te alofa o Iesu mo tena Tamana? Tamaliki, ke tuku atu foki a `tou ola mo `tou foitino ke fakaaoga mo fai a te finagalo o te Atua i te lalolagi nei i aso katoa e ola ei tatou.

Mea fai a tamaliki:

- `Kala a te ata #57

Faifesili ki fesili e autu tonu loa mo te `tala a tatou i te taeao nei.

Pese: Tuku tau Meaalofa mo te Alikī.... (fili I te tusi pese)

Fuaiupu Tauloto: Mataio 2:6 "A koe foki e Petelema i te fenua o Iuta, ka sili atu tou taulia i Alikī o Iuta; me e tupu mai ia koe se takitaki tela ka pule ne ia toku fenua ko Isalaelu."

Talosaga:

Te Atua o te Alofa tauanoa, fakafetai matou mo te tala gali. Kae akai matou ke fesoasoani mai koe ki omotou olaga, ke fiafia matou o `sala faeloa ki a koe i omotou olaga, kae maise, ke fiafia foki matou o ōla mō koe. Amene.

ULUTALA 6: KO IESU I TE FALETAPU

Pogai: Ke akoako a tamaliki ke fiafia ki tapuakiga kaufakatasi e pela mo Iesu.

Tusi Faitau: Luka 2:41–52

Fakatokāga mō Faia`koga:

Te Paseka e fakaamasaua i ei te fakasaoga ne te Atua a te fanauga a Isalaelu mai i te olaga pologa i Aikopito. A te Paseka e fakamanatu i tau-saga katoa i te masina o Mati ki a Apelila ne tino Isalaelu fua mo olotou tavini kola ko oti ne pilitome (Esoto 12:1-14). A te muna Paseka ne fuli mai i te muna Epelu, ako tona uiga ko te `fakaseke' "... *Kafai e matea ne*

au a te toto, ka fakaseke ne au a te fale tena, kae ka se oko atu te fakasalaga tena ki a koutou tela e oko ki tino Aikopito” (faitau13). Te Paseka ne gata loa i a Iesu kae i te taimi foki loa tena ne faatu ne Iesu te Kaiga Tapu a te Aliko tela ne fai mo fakamasaua a tona mate, tona toetu ke oko loa ki tona toe foki mai. Te Paseka i taimi o Iesu e fakamanatu i Ielusalem a tela e tu i ei te Faletapu tela i te talitonuga o tino Iutaia, e nofo i ei a te Atua. E tena foki te pogai ne tali pena a Iesu ki ona matua, ke fetau mo te talitonuga tena, "E se iloa ne koulua me ko tau au o nofo i te ale o toku Tamana?" kae a te tonuga, a te Atua e nofo i koga katoa (Sala.139:8; Isa.66:1).

Lesona:

Ko sefulu tausaga o Iesu, kae olo mo ona matua kite kaiga ote Paseka. Te 'Paseka', (Passover), kote fakaseke o fakasao a fale o tino Isalaelu kola ko oti ne fakamailoga kite toto kae ke ta fua ko kaiga i fale kola ka seki fakamailoga kite toto. Te Paseka, ko fakamasaua sale i aso nei, ite Kaiga of Aliko, tesdla ko fai pela me ko te toto mote foitino oKeliso tela ne fakasao ei tatou mai ite agasala mote mate. Iesu ne tupu ake ite poto, te atamai, ite mafaufau mote foitino, faka te agaga pela foki fakate foitino. Ne foki a tino ki olotou fakai, ako Iesu ne nofo i loto ite fale tapu. Ne sala kae ne maua atu ite fale tapu.

Mea a'koga mo fakamāina ei a te mataupu:

- Ata #59

Fakatomuaga: Ko oi e masani sale o olo tasi mo olotou matua ki te fale tapu? Nei ka fakalogologo tatou ki te tala o Iesu ite ologa mo ona matua ki te faletapu.

Akoakoga:

A Iesu e masani saale o olo mo ona matua ki te faletapu lasi i Ielusalema i taimi o tapuakiga. Kae i te taimi e tasi ne olo ei ki te paseka, ne seki 'foki fakatasi mo ona matua kae ne nofo e iloa i te faletapu o akoako atu a te muna a te Atua. E lavea ne tatou i konei a te loto naunau o Iesu o nofo i loto i te faletapuaki. A tatou foki e tamaliki e 'tau o fakaakoako ki a Iesu o fiafia ki tapuakiga kaufakatasi o tapuaki atu ki 'tou Atua. E tenei te auala e tasi e fakaasi ei ne tatou i 'tou olaga me ia tatou e a'lofa ki te Atua kae fiafia foki o fakalogologo ki tena muna kae tapuaki atu ki a ia.

Pese: "Tou olo ki mua mo te Atua....." (fili I te tusi pese)

Fuaiupu Tauloto: Luka 2:49 "Ne tali atu a Iesu ki a laua, "Ai a e sala-sala mai ei koulua ki a au? Ese iloa ne koulua me ko 'tau au o nofo i loto i te fale o toku Tamana?"

Talosaga:

Te Atua te motou Tamana, fakafetai mo akoakoga o te olaga tupu ake o Iesu kola e 'tau matou o fakaakoako ki ei. Fesoasoani mai o fakamalosi mai matou ke tumau matou i te fialia o tapuaki atu ki a koe i aso katoa o motou olaga. Amene.

VAEGA 2: FAKATOKĀGA MO TENA KALAGAGINA

ULUTALA 7: KO TE TINO FAKATOKA – IOANE TE PAPTISO

Pogai: Ke iloa ne tamaliki a te tãua o te fakatokāga ne fai ne Ioane mai mua faeloa o kamata a te galuega a Iesu.

Tusi Faitau: Ioane 1:19-28

Fakatokāga mô Faia'koga:

A Ioane te Papatiso i tusitusiga a Evagelia e pela mese pelofeta tela ne vau mai te koga lavaki o folafola a te Malo o te Atua mo te fakatonuga ke salamo a tino (Mata.3:1-12; Male.1:4-8; Luka.3:1-20). I te fakamatalaga a Luka, a Ioane ne vau mai te gafa faitaulaga o tena tamana ko Sakalia mo Elisapeta tena matua (1:5-80; 3:2), kae e fakaasi foki i konei i a Iesu mo Ioane e kaiga. E molimau ne Mataio mo Maleko a gatu fulufulu kamela o Ioane, tena fusi faite mai pakili o manu, kae e kai ki meli mo se akelise (Mata.3:4; Male.1:6). Ne papatiso ne ia a tino kola ko salamo ki olotou agasala, kae folafola ne ia a te okomai o ia tela e vau i toku tua e sili atu i au, kae ka papatiso ne ia a koutou ki afi mo te agaga. E tenei te tusaga o Ioane tela fakapau ei a ia ki te pelofeta ko Isaia (Mata.17:10-13; Male.9:11-13) tela e folafola kae fakatoka ne ia te oko mai o te Mesia.

Lesona:

A Ioane ne kalagagina ne te Atua ke fai mo leo e fakatoka ei a te oko mai o Keliso [Ioane 1:6]. Kae koi tuai o oko mai a ia, kae ko leva foki loa ne 'valo ne te pelofeta ko Isaia me ia ia ka oko mai [Ioane 1:23]. A Io-

ane tenei tela ne fakaigoa pela me ko Ioane te Papatiso ko te tamaliki a Sakalia mo Elisapeta [Lk1:5], a ko Elisapeta e fakatautaina mo Malia te matua o Iesu [Lk1:36], tela la a Ioane e fakatautaina foki mo te Aliko ko Iesu. A tena galuega ko te `valo eiloa ki tino Isalaelu ke salamõ ki olotou agasala kae ke `fuli mai ki te Atua.

Mea a'koga mo fakamãina ei a te mataupu:

Ata #60

Fakatomuaga:

E isi ne `valo e masani o lagona saale ne tatou i `tou fenua e fakaoko mai ei se fekau tãua ki a tatou, e pena foki a Ioane te Papatiso, ne kalaga saale o `valo ne ia a te oko mai o te Aliko Fakaola ko Iesu Keliso.

Akoakoga:

A te vau o Iesu ki te lalolagi nei ne seki gata fua i fakaasiga kola ko oti ne lagona ne tatou i Asotapu konei ko `teka, kae ne molimaugina foki ne Ioane te Papatiso i te `valo saale ne ia me i te Fakaola ko pili o oko mai. A Ioane e fakaigoa saale foki me ko te *tagata teuteu ala* ona me ia ia ne vau o teuteu io me o fakatokatoka a te oko mai o Iesu. Ne fakamalosi ne ia ki tino ke na salamõ ki olotou agasala kae ke papatiso latou ki te vai. Se tusaga lasi kî tenei ne fai ne Ioane mô te vau o Keliso kae tãua nei ko `tou tusaga kola e `tau o fai mô Iesu i `tou olaga. E manako mai a Iesu ke tautali tatou i ana akoakoga kae maise ke talia ne tatou a ia ke fai mo Fakaola i `tou olaga `tupu ake.

Pese: Sweep over my soul (fili I te tusi pese)

Fuaiupu Tauloto: Ioane 1:15 Ne molimau a Ioane ki te Muna, kae kalaga malosì penei, Tenei a ia tela ne faipati saale au ki ei, A ia tela ka vau i oku tua, e sili atu i a au, ne muamua foki i a au.

Talosaga:

Fakafetai lasi te Atua mo Iesu pela foki mo Ioane mo tena galuega fakatino. Fakaaoga atu matou ke fai foki matou mo molimau ki tau tama ko Iesu kae maise ke talia katoatoa ne matou ke fai a ia mo Fakaola i omotou olaga. Amene.

ULUTALA 8: KO TE PAPTISÔGA O IESU

Pogai: Ke akoako a tamaliki ke iloa ne latou a te papatisoga o Iesu.

Tusi Faitau: Mataio 3:13-17

Fakatokāga mô Faia'koga:

A te Papatisoga se Sakalameta tela se faifaiga lavea tela e fakasino tonu ki galuega fakaola a te Atua tela ne auala mai i tona alofa i a Iesu. Te muna *Papatisoga* se muna Eleni tela e fakauiga ki te *ufi ki te vai mo fulu ke ma a lailaiga*. A te papatisoga tena, e pela foki mo te papatisoa a Ioane te Papatiso, e fakasino ki te taimi mai mua tela ka mate i ei a te 'fakaola' (Iesu) kae maligi a tona toto mo fakamagaloga a agasala.

Te papatisoga e fai i te igoa o te Tamana, te Tama mo te Agaga Tapu (Mataio 28: 19); ako te vai tela e fakaaoga ko te fakatusa o te toto o Iesu. A te papatisoga tena e fakamailoga i ei a te tuku atu o tou olaga i fakatuanaki ki a Iesu, kae ko te fakamailogaga foki o te alofa tauanoa o te Atua. Te faifaiga tenei e fakaasi i ei, i te vai e semafai ne ia o fakama a tino mai i ana gasala ako te talia o Iesu i te fakatuanaki e magalo ei a tatou (Galuega 18: 25; 19: 4). A te vai ko te failoga lavea o te galuega se lavea o te alofa fakaola o te Atua i a Iesu.

A Iesu ne papatisogina i tona manakoga, tela se fakaasiga o tona loto malalo i tona kaufakatasi mo tino agasala ako ia e seai ne ana agasala.

Mea a'koga mo fakamāina ei a te mataupu:

Ata #60 – mea nei ko te vauga a Iesu ki a Ioane tela ka papatiso ei a ia ne Ioane i te vaitafe ko te Iolitana.

Fakatomuaga:

Koutou kai papatiso? Seã a te uiga o te papatisōga?

Akoakoga:

A Iesu ne papatiso ne Ioane te Papatiso i te vaitafe ko te Iolitana. E se ko te papatisōga o agasala me ia Iesu e seai lele e iloa se ana agasala, kae se ata fakaasi ki tino a tena mate mo tena toetu manumalo mai i te mate. I te fakapulu ki lalo i te vai, ko te ata o te mate mo te fano ki lalo i te tugamau, kae ko te 'toe fakanake mai lalo o te vai ki luga, ko te ata o tena toe tû manumalo mai i te mate ki te ola. E tenei tonu e iloa a te uiga mo te fakailoga o te papatisōga kae e tãua ko tatou ke papatiso e fakaasi ei ne tatou ki te lalolagi me ia tatou ko oti ne talia ne tatou a Iesu ke fai

mo Fakaola i `tou olaga me ne mate mô `tou agasala ke fakamagalogina, kae e talitonu patonu foki tatou ki tena mate mo tena toetu manumalo mai te mate, tela ka toetu foki ei tatou mai i te mate ki te ola e se gata mai i te malo o te Atua. A te papatisõga o pepe se taliaga io me se fakamailoga o te taliaga o te pepe tena ki loto i te mafutaga faka te ekalesia kae e `ese mo te papatisõga ne papatiso ei Iesu, tenei te mea e tãua ei ko tatou e tamaliki ke malamalama faka`lei i te papatisõga o Iesu.

Mea fai a Tamaliki:

- Akoako a te fuaiupu tauloto
 - Fai fesili e uiga mo te papatisõga ko te mea ke malamalama faka`lei a tamaliki i te uiga tonu e papatiso ei latou.
- Usu pese

Pese: Cause me to drink from the river, O Lord (fili I te tusi pese)

Fuaiupu Tauloto: Mataio 3:16 Me ne pena e iloa o alofa mai te Atua ki te lalolagi, ne tuku mai ne ia tena tama tokotasi, ko te mea ke se malaia so se tino e fakatuanaki ki a ia, kae ke maua ne ia te ola e se gata mai.

Talosaga:

Te motou Atua, fakafetai mo Iesu tau tama fagasele. I tena mate mo tena toetu manumalo mai i te mate ko maua ei ne matou se faka-moemoega tela e ola kae mautinoa. Avatu matou ki a koe kae ke fai matou mo tamaliki e a`lofa, e äva kae ma`taku ki a koe i omotou olaga. Tausi matou mai i te Fili kae ke ola Keliso ia matou, ona ko Iesu. Amene.

ULUTALA 9: KO TE FAKALIKILIKIGA O IESU.

Pogai: Ke fesoasoani ki tamaliki ke iloa ne latou me sea a te tãua o te fakalilikiki i tulaga faka-tapuakiga.

Tusi Faitau: Mataio 4:1-2

Fakatokāga mô Faia`koga:

A te fakalilikiki e fakauiga ki te se kai ki meakai. A te fakalilikiki mo tapuakiga io me anapogi ko te se kai o tino ki meakai, ona ko te fakafeagai

o ia (latou) mo te tapuakiga fakapitoa tena. I te Feagaiga Mua e mafai o fakalilikili mo tapuakiga a tino i a ia e iloa, io me fai fakatasi ne tino o te fenua (Ese.8:21-23; Nemi.1:4-11).

Te anapogi io me ko te fakalilikili mo tapuakiga se vaega o te tapuakiga tela e fai fakatasi mo te faitalosaga, talo fakatauanau, a nisi e pei ki gatu lautaga masaesae; e fakaasi i ei te olaga ko pela me fakasalagina; e tagi fanoanoa (Nemi.9:1; Tani.9:3) i te salamo ki agasala io me manako ke maua se fakatokaga lei e fai ne te Atua mo latou. Te fakalilikili tokotasi e pau loa te faiga tela e fakavae ki ei te fakalilikili o tino o te fenua katoa (2Samu.12:16-23; 1Tupu.21:27). A tino ne fakalilikili mo tapuakiga i taimi ne masaki i ei (Sala.35:13-14); io me fakatauemugina i ei (Sala.109:4-21).

I te Feagaiga Fou ne fakamalosigina ne Iesu me tau o fai te anapogi mo te loto fiafia (Mata.6:16-18 c.f Saka.8:19); a ko ia foki ne fakalilikili mo tapuakiga i te kamataga o tena galuega (Mata.4:2), kae ne seki fakamalosi ne ia a ona soko ke fakalilikili mo tapuakiga (Male.2:18-20). Fakamuli ifo loa i te kamataga o galuega a te kau-Apositolo, ne masani a latou o fakalilikili mo tapuakiga mafai ko fakatapu a latou mo te galuega (Galu.13:2-3, 14:23) mo taimi foki kola e feagai ei a latou mo faigata lasi (Galu.27:1-38).

Mea a'koga mo fakamāina ei a te mataupu:

Ata #61

Fakatomuaga:

Kai aka loa se taimi e manako kii koe kise mea e taua kii ki tou loto kae salasala koe kise auala kae se mafai ne koe?

Akoakoga:

E lavea ne tatou me taaua kii te fakalilikili aua me tenei te auala e mafai o galue fakavave iei te Atua mo te tulaga o fakalavelave e feagai mo tatou io me tali mai fakavave ki taa manakoga. Tela la fanau e tau mo taua o fakataua ne taua te faifaiga tenei I te tulaga koi ola ai taua I te olaga tenei.

Mea fai a Tamaliki:

- Tali a fesili ne fakatoka ne te Faia'koga
- Akoako a te Fuaiupu Tauloto

Usu pese

Pese: Seek ye first the kingdom of God (fili I te tusi pese)

Fuaiupu Tauloto: Isaia 58:6 A te vaega fakalikilikiga tela e manako au ki ei tenei: Ave keatea a uiga fakasaua mo te se tonu, kae tuku atu a latou kona ne fakasauagina ke olo mo te saoloto.

Talosaga:

Te Aliko, fesoasoani mai kia matou fanau ke iloa tonu ne matou a te taua o te fakalikiliki I omotou olaga sasaele ka koi ola matou I te olaga nei.

ULUTALA 10: KO TE FAKAOSOOSOGA MUAMUA.

Pogai: Ke akoako a tamaliki ke maina a latou i te fakaosoosoga muamua ne tofotofo ne Satani ki ei a Iesu.

Tusi Faitau: Mataio 4:3-4

Fakatokāga mô Faia'koga:

A te fakaosoosoga a Iesu ne Tiapolo (Mata.4:1-11; Male.1:12-13; Luka.4:1-13) ne tupu i te otiga loa a ia ne papatiso. Te faifaiga tenei e fakamatala i aso nei me ko te fakatapuga o Iesu mo te galuega fakamesia tela e fakavae ki te ei a tena fai mo tavini (Mata.3:13-17; Male.1:9-11; Luka.3:21-22 c.f Male.10:45). Te fakaosoosoga e se mo fakapatonu a te tulaga faka atua [Tama a te Atua] o Iesu, kae mo 'tofotofogina' me talia katoatoa ne Iesu o fakalogo ki te Atua i te fai mo Mesia lotomalalo e pela mese tavini io me fakaasi kae fakataunu tena tulaga faka-Mesia ki te malosia mo te fai-mea-mafai.

E fakamaina fakalei ne Tusi Tapu me i te Atua e se tofotofo ne ia a tino ke fai a mea se (Iako.1:12-15), kae e fakatoka foki ne ia te avanoa ke mafai ne tino o teke a fakaosoosoga (1Koli.10:13).

A te tagata e se katoatoaga tona malosia mo fakafeagai a te olaga o aso takitasi ma kai fua e kai ki meakai (falaoa) o te olaga nei; kae e tau o kai ki meakai faka-te-agaga tela ko te Muna a te Atua, ko katoatoa ei te malosia e tau o mau ne ia mo agai ki ei a fakaosoosoga.

Lesona:

Te lua o fakaosoosoga a Iesu ne te Tiapolo, ne ave a ia ki te fakai tapu e igoa ki a Ielusalema. A te koga maluga e pela me se taoa (fakaaoga ne kautau o Loma) tela e lavea ei ne koe a tino katoa. A Iesu ne fakaosooso

ko te mea ke fakataunu a te feagaiga o te puipuiga. (Salamo 91:11-12)
ki te tofotofoga.

Mea a'koga mo fakamāina ei a te mataupu:

- #61
- Se ata o Iesu i te taimi o te fakaosoosoga

Fakatomuaga:

Kai tofotofoga aka koe i tou olaga? Nea tofotofoga ne oko ki a koe? E mata tofotofoga kona ne manumalo koe i ei io me ko koe ne takavale.

Akoakoga:

Te tulaga o te tofotofoga a Iesu ne te tiapolo, e fakaasi mai ei te manumalo ei a Iesu tela ne seki talia ne ia a pati takolekole ne fai ki ei. Ona ko te malosi o te Atua ne ala ei o manumalo ei a Iesu i tofotofoga kona. Tela la, tamaliki se tulaga mo tatou ke kaufakatasi mo te Atua i sose taimi, kae mafai ei ne koe o maua te malosi o teke a tofotofoga se tonu ki tou olaga.

Mea fai a Tamaliki:

- Tali a fesili kola ne fakatoka ne te Faia'koga
 - Akoako a Fuaiupu Tauloto
- Faka- koseti te tala

Pese: Seek ye first the kingdom of God (fili I te tusi pese)

Fuaiupu Tauloto: Mataio 4:4 "Ne tali atu a Iesu, muna a te tusi, E se na ko meakai fua e ola ei te tino, ka ko muna katoa kola e `to mai i te gutu o te Atua"

Talosaga: Te Aliko e tonu ke se tofotofoga ne matou koe aua koe ko te motou Atua tela e tapu kae malu, Amene.

ULUTALA 11: KO TE LUA O FAKAOSOOSOGA.

Pogai: Ke akoako a tamaliki ke iloa ne latou me i te Atua e aumai ne ia a te malosi i taimi o tofotofoga.

Tusi Faitau: Mataio 4:5-7

Fakatokāga mô Faia’koga:

Te Fakai Tapu ko Ielusalema, kae ko `te koga tafa maluga o te faletapu’ se koga ki te feitu ki saute o te faletapu tela e maluga kae fakavae i te kaugutu o te mauga tela e sifo ki lalo i te vanu. A Iesu ne fakaosooso ne Tiapolo ko te mea ke lele ki lalo mai i te koga tafasili i te maluga tenei; e tofotofogina a te fakatuaga o Iesu ki te feagaiga a te Atua me ka tausi fakalei ki ona tino (Salamo.91:11-12).

A te fakatuanaki ki te Atua e se tau o tofotofogina penei (Teu.6:16). A Iesu ko fakaosoosogina ke fakaaoga a vavega mo fai a tino ke talitonu; kae ko Iesu ne seki talia ne ia ke fakaasi a tona tulaga pule i te fai ne ia o ne vavega fakafoofogia (Mata.12:38-42; Luka.16:19-31).

Lesona:

Te lua o fakaosoosoga a Iesu ne te Tiapolo, tela ne ave ki te fakai tapu e igoa ki a Ielusalema. A te koga maluga e pela me se taoa (fakaaoga ne kautau o Loma)tela e lavea ei ne koe a tino katoa. A Iesu ne fakaosooso ko te mea ke fakataunu te feagaiga o te puipuiga. (Salamo91:11-12) ki te tofotofoga.

Mea a’koga mo fakamāina ei a te mataupu:

Faka-koniseti a te tala

Fakatomuaga:

Kai tofotofoga aka koe i tou olaga? Nea tofotofoga ne oko ki a koe? E mata tofotofoga kona ne manumalo koe i ei io me ko koe ne takavale.

Akoakoga:

A te tulaga o te tofotofoga a Iesu ne te tiapolo, e fakaasi mai ei te manumalo ei a Iesu tela ne seki talia ne ia a pati takolekole ne fai ki ei. Ona ko te malosia o te Atua ne ala ei o manumalo ei a Iesu i tofotofoga kona. Tela la, tamaliki se tulaga mo tatou ke kaufakatasi mo te Atua i sose taimi, kae mafai ei ne koe o maua te malosia o teke a tofotofoga se tonu ki tou olaga.

Mea fai a Tamaliki:

Faka-koniseti a te tala

Pese: Majesty! Majesty, worship his majesty (fili I te tusi pese)

Fuaiupu Tauloto: Faitau 7 "Ne tali atu a Iesu, "kae se `tau mo koe o tofotofa a te Aliko tou Atua"

Talosaga:

Te Aliko, fesoasoani mai kia matou fanau ke iloa ne matou me ia koe te Atua e aumai ne koe te malosi I taimi o tofotofoga.

ULUTALA 12: KO TE FAKAOSOOSOGA I TE TOLU.

Pogai: Ke fakailoa ki tamaliki ke iloa ne latou i te fakamaoni ki te Atua e `tau o ola i `tou olaga.

Tusi Faitau: Mataio 4:8-11

Fakatokāga mô Faia'koga:

Ne ave ne Tiapolo a Iesu ki te mauga tafa maluga o tofotofa i ei a te fakamaoni o Iesu ki tona Tamana. Te olo o Tiapolo mo Iesu se faifaiga tela ne fai loa pena io me se fakaasiga fua (vision); ona e seai se mauga maluga e mafai o kilo mai i ei se tino ke lavea ne ia a malo katoa o te lalolagi. I te sua feitu, i te fakamatalaga a Luka (4:6) me ne fakaasi ne Tiapolo me o ia kotoa a malo katoa kona.

I te tofotofoga tenei, ko se fakaaoga ne Tiapolo a te fakamunaga masani a ia tela e penei, "Kafai koe ko te Tama a te Atua," kae ko avake ne te Tiapolo te auala faka-potiki tela e faigofie kae vave mo fakatoka te galuega ne vau ei a ia Iesu. "Kafai e manako a koe o fai mo takitaki o malo konei, e tau mo koe Iesu o fakapatonu a toku tulaga pule i malo o te lalolagi i te ifo mai o koe ki a ia."

"Fano keatea Satani!" ne fakaaoga foki ne Iesu a muna konei ki a Petelu ona mene tofotofa foki ne ia a ia.

Lesona:

Ko te tolu o tofotofoga ki a Iesu, ne ave ki te toe mauga maluga. A te ave ki koga maluga, se fakaasiga i te Luka 4:6 e fai mai, i te tiapolo o ia a mea katoa konei. E tenei te tofotofogae faka mesia. I te Mataio 16:23 (Maleko 8:33) Te fakamatalaga ki te faipatiga a Iesu ki a Satani " Fano ki atea Satani, ne faipati ne Petelu ona ko te fakaosoosoga a Iesu

Mea a'koga mo fakamāina ei a te mataupu:

- Ata #61

Se ata i te avega ne Satani a Iesu ki te toe mauga maluga. [mafai e isi]

Fakatomuaga:

Kai lavea aka ne koe se mauga? Kafai e oko koe ki luga i te mauga, kae lavea katoa ne koe a te fakai katoa. I te aso nei, ko toe tofotofoga a Iesu ne Tiapolo, tela e lavea ei te fakamaoni o Iesu ki te Atua.

Akoakoga:

E fai mai te tala i te fakamaoni o Iesu ne se takavale a ia i tofotofoga a tiapolo. E tena foki te manakoga o te mataupu tatou i te taeao nei, ke lavea te tou fakamaoni ki te Atua i mea e fai ne tatou i aso taki tasi. Tou fakamaoni e mai luga i tofotofoga kola e fakasagai mo tatou, tasi ko te fakatakavale ne tatou a tofotofoga kona, e pela mo Iesu ne fakatakavale ne ia a fakaososoga kola a tiapolo, kae lavea ei te malosia o tena fakamaoni ki te Atua. Nea la tofotofoga konei e panaki mo tatou?

Mea fai a Tamaliki:

- Sautala malie ki te mataupu

Pese: Fili I te tusi pese

Fuaiupu Tauloto: Faitau? Ne toe ave foki a Iesu ne te Tiapolo ki te mauga tafa maluga, kae ne fakaasi au katoa ki a ia a malo o te lalolagi mo olotou malu.

Talosaga: Te Atua alofa, tuku mai ki a matou a tou fakamaoni ke olagina ne matou. Amene.

VAEGA 3 - KO PUAPUAGA MO TE SATAULO O KELISO

ULUTALA 13: KO ULU MANUMALO A IESU KI LOTO I IELUSA-LEMA

Pogai: Ke atiake a te iloa o tamaliki me ia Iesu ko te Fakaola o tatou

Tusi Faitau: Mataio 21:1-11

Fakatokāga mô Faia'koga:

Te Ulu Manumalo o Iesu ki loto i Ielusalema se ata tafasili i te gali tela e lavea i ei a ia se Tupu mo te Fakaola o te lalolagi. A Petefake (te Fale Mati) se fakai foliki tela e tu pili ki te Mauga o Olive te koga tela e lavea lei mai i kona a Ielusalema. A te asini mo tama asini ne aumai katoa ki a Iesu mo sopo a ia i ei (f.7) me "e manako ki ei a te Alikī". Te mea tenei ne fai ne Iesu e fakataunu i ei a muna a te pelofeta ko Sakalia (9:9) me ko fakaasi ne Iesu i a ia se tino o te filemu kae e 'se fakavae a tona malo ki malosi mo te fia maluga. E 'se ai loa se fakaasiga a Iesu ne fai me i a ia se tupu, kae i taimi ne sopo ei a ia i luga i te asini, a ona soko ne fola a gatu o latou i te auala kae kalaga mo te leo lasi mo laupama i olotou lima, "Ke manuia a te tupu tela e vau i te igoa o Tavita!" Ne uate a tino i Ielusalema ona ko te faifaiga tenei.

Mea a'koga mo fakamāina ei a te mataupu:

- Sala ne ata lomi (Ulu manumalo o Iesu ki loto i Ielusalema)
Fakaaoga a te ata #81

Fakatomuaga:

Kai sopo aka koe i tua o te asini? Io me kai lavea ne koe se asini? Te aso tapu tenei, ko te tala i te ulu manunmalo o Iesu ki loto i Ielusalema.

Akoakoga:

Te fakaaloalo atu tatou ki sose tino e taua kii ki tou olaga. E pena foki a te malaga o Iesu e fakaataata ei tena lotomalalo o ia tela ne fakaaoga ei ne ia te manu tenei ko te asini kae se ko te solofanua. Tela la, tamaliki se tulaga ke ola te manatu tenei te lotomalalo mo te fakaaloalo i tou olaga sau katoa kae maise la ko tou fakaaloalo ki te atua tela ko ia te tupu o tatou tino katoa.

Ke masaua foki ia taua tamaliki me ia Iesu ko tou fakaola tela ne mate mo magalo tou agasala.

Mea fai a Tamaliki:

Faka-koniseti a te tala

Pese: Fili i te tusi pese

Fuaiupu Tauloto: Faitau 8-9E tokouke a tino ne fola olotou gatu i te auala, ka ko nisi tino ne fati ne latou a kaula mo fola te auala. A te vaitino kola ne sasale i mua mo tua o Iesu, ne kalaga penei, Ke vikia te Tama a Tavita! Ke manuia a ia tela e vau i te igoa o te Alikī! Ke vikia te

Atua!

Talosaga: Te Atua, aumai ki a matou se lotou ava kae fakaaloalo ke ola i a matou katoa. Amene.

ULUTALA 14: KO FAKA'MA NE IESU A TE FALETAPU

Pogai: Ke akoako a tamaliki ke iloa ne latou te taua o te Faletapu

Tusi Faitau: Mataio 21:12-17

Fakatokāga mô Faia'koga:

I te fakamatalaga a Mataio a Iesu ne fakama ne ia te faletapu i te aso muamua ne oko mai a ia ki Ielusalema; a Maleko e fai me i a Iesu ne ulu ki lotou i te faletapu toe foki ei i tona auala ki Petania. A ko Ioane e fai pela i a Iesu ne fakama ne ia te faletapu i te kamataga o tena galuega talai kae e pela me ko mao malosia a Ioane mai i molimau a nisi evagalia (Ioa.2:13-22).

I tua o te faletapu kae i te faitu ki lotou o te pui, i te avanoaga mo Tino o Fenua fakatea (Court of the Gentiles); kola e aofia i ei a faitu e tolu o te faletapu, tela se vaega foki loa o te faletapu, e tu i ei a koga togi uaina mo manu mo fai a taulaga, mo koga fuli ei a tupe mo fai a lafoga mo te faletapu. E seai loa se fakaasiga manino i te Tusi Tapu me i tino Iutaia e teke ki faifaiga konei; kae e lavea i konei te faigofie mo tino o maua a mea e manako ki ei mo fai a olotou lafoga pela foki mo taulaga.

Sea te pogai ne fai i ei ne Iesu a te mea tenei? A Iesu e se teke ki te taulaga o te faletapu mo tapuakiga kola e fai i ei. A ko Iesu e se fiafia ki faifaiga kola e fai mo fakase te pogai ne fakatu i ei te faletapu. A te Fale o te Atua e tau o tautasi ki faiga kola e lavea i ei te ava mo te mataku ki te Atua.

Te Faletapu ko te fale talo kae e sei se maketi mo fakatau a manakoga o te olaga. A maketi ko koga e fai i ei a faifaiga fakapisinisi kae e mafai foki o ulu i lotou i faifaiga kona, a togafiti kola e fakamasei ne ia a taulaga lei o te olaga.

Mea a'koga mo fakamāina ei a te mataupu:

Sala ne ata Lomi io ata vitio (fakama ne Iesu te faletapu)

Fakatomuaga:

Kooi e teuteu ne latou te Faletapu? Kaia e teuteu ei te faletapu? I te aso

nei, ka fakalogologo tatou ki te tala i te fakama ne Iesu te faletapu?

Akoakoga:

Te tulaga ne oko a Iesu ki ei, tela ne fakama ne Ia te faletapu aua ko fakaaoga `se ne tino mo fakatau a mea i loto. Tela la, ke fakaaoga tonu ne tatou a te faletapu a te Atua. E taua kii a te faletapu a te Atua, e fai ei a tapuakiaga, fai talosaga mo usu a vikiga ki te Atua. Tamaliki, mo tatou, a tou foitino foki ko te faletapu a te Atua ke tausī fakalei kae ke ma`. E tausī ne tatou pefea tou foitino ke ma ? Tausī ke ma mo fakaaoga mo foitino mo te Atua. Tuku katoa tou loto mo tou olaga ki te Atua

Mea fai a Tamaliki:

Fai fesili

Pese: Fili i te tusi pese

Fuaiupu Tauloto: Faitau 12: Ne ulu atu a Iesu ki loto i te Faletapu, kae ne afuli ne ia ki tua a tino katoa kola ne fakatau mea i ei. ne tule foki ne ia a laulau a tino faka`liu tupe, pela foki mo nofoaga o tino fakatau tupe. Faitau 13(e) E taku toku fale ko te fale talo.....

Talosaga: Te Atua, fakaasi mai ki a matou a te fakaaoga fakalei a te faletapu.

ULUTALA 15: KO TE TOE 'KAIGA A TE ALIKI.

Pogai: Ke fesoasoani ki tamaliki ke iloa ne latou a te Kaiga a te Alikī ko te toe kaiga ne fakatoka ne Iesu mo latou.

Tusi Faitau: Luka 22:14-20

Fakatokāga mō Faia'koga:

Te Kaiga Tapu io me ko te Kaiga a te Alikī e fakauiga ki te Kaiga fakaoti tela ne manako a Iesu ke faikaiga fakatasi a ia mo ana Soko i te kaiga o te Paseka ka koi tuai a ia o mate. I te Kaiga tenei ne fakatu ne Iesu a te uiga fou tela e fakamasaua i ei a te Alikī ko Iesu Keliso i tona mate mo tena toetu.

Te igoa o *te Kaiga a te Alikī* ne mafua mai i te tusi muamua a Paulo ki te Ekalesia i Kolinito (11:20). A tusitusiga faka-Sinopi e molimau me i te Kaiga tenei ko te kaiga a Iesu mo ona Soko i te Paseka (Mata.26:19;

Male.14:16; Luka.22:13). Te Kaiga a te Aliko se kaiga lasi tela e fai i ei te fakamanatuga o Iesu ne ona Soko, kae fakamuli ifo, a te kaiga tenei ko fai mo Sakalameta [kilo 'sakalameta' mataupu 25, Vaega 5, Tausaga 12]. I te kamataga, a te Kaiga a te Aliko e fakamanatu i ei te fakamoemoega me ko pili mai a te Aso e toe foki mai i ei a Iesu ki te lalolagi nei (Male.14:22-25; Luka.22:14-22; 1Koli.11:23-26 c.f. Ioa.6:35-59). E seai ne tulafono me fakamasaua i te taimi fea a te Kaiga a te Aliko, kae ke fai te kaiga tenei i taimi katoa e loto koutou ki ei (1Koli.11:25).

Mea a'koga mo fakamāina ei a te mataupu:

Sala ata lomi te ata o Iesu e kai fakatasi ei mo ana taugasoa

Fakatomuaga:

Nea meakai e maua ne koe i se kaiga ma fai? Nea foki a kaiga ne aofia ei koe kiei? E mata koe ne talia ne koe se kaiga ne fano koe kiei meikai? Te aso nei, ka fakalogologo tatou ki te tala i te toe kaiga a Iesu mo ana taugasoa.

Akoakoga:

Te ata ne lavea ne tatou i te taeao, ia Iesu ne fakatoka ne ia se kaiga fou mo tatou, tela ne mate, maligi tona toto ke maua ne tatou te saolotoga kae maua foki ne tatou te fakaolataga ma fai e talitonu tatou ki a Ia. Tela la, tamaliki se tulaga tafasili i te taua mafai e ke talia katoa-toa ne tatou a Iesu ki loto i tou olaga, me ko ia eiloa ne fakasao ne ia tatou mai te nofo agasala i mua o te Atua.

Mea fai a Tamaliki:

Ke faka koniseti ne latou te tala

Fuaiupu Tauloto: Faitau 19-20

“Ne puke a ia ki te falaoa, ko fakafetai, ko tofitofi, kae avatu ki a latou, ana muna, ko toku foitino tenei, ko toku atu mo koutou ke fai mo fakamanatuga ki a au. Ne pena foki o puke ki te ipu i te otiga ne kai, ko fai atu penei, Ko te ipu Te kaiga tenei ko te toe kaiga a Iesu mo ana soko, kae ko pili ei a ia o mate tenei ko te feagaiga fou i toku toto, ko fakamaligi mo koutou.”

Pese: Fili I te tusi pese

Talosaga: Te Aliko, talia mai au, fai koe mo toku fakaola i aso katoa o

toku olaga, Amene.

ULUTALA 16: IESU I TE FAATOAGA O KETESEMANE

Pogai: Fesoasoani ki tamaliki ke lavea ne latou a puapuaga o Iesu i te toe vaiaso o tena olaga, kae maise i te faatoaga o Ketesemane.

Tusi Faitau: Maleko 14:32-42

Fakatokāga mô Faia’koga:

A Ketesemane i te gana Epelu ko *Te Koga Faite Sinu* kae e lua taimi e fakaasi i a Maleko (14:32) mo Mataio (26:36) ne talo i ei a Iesu i te toe taimi faigata ne fakafeagai mo ia, tela ko pili o malukuluku a tona loto; ne lagona ne ia te logomae me i ona soko ko se mafai o pula fakatasi mo ia; ne oko mai a tino fakalata tino o puke a ia. Konei a fakaasiga o te taimi faigata ne fakafeagai mo Iesu i Ketesemane.

E seai se fakaasiga manino ko oti ne maua e uiga mo te koga e tu i ei a Ketesemane, kae e molimau a Maleko mo Mataio me tu pili ki te Mauga o Olive. A Luka e se fakaasi ne ia me ko Ketesemane kae ko te Mauga o Olive te koga ne talo i ei a Iesu. A Ioane ne fai me se koga i te feitu ki te Togala o te Mauga o Olive. Ko tuku taumate ne tino o aso nei me i a Ketesemane se koga pili io mese koga o te Mauga o Olive.

E fakamatala ne te tusi a te kau Epelu (5:7-8) me i te ata o Ketesemane ko te ata o te fakalogomuna, te loto malalo, mo te katoatoa o te tuku atu ne Iesu a tona olaga katoatoa mo fai te loto o tena Tamana. Ne aumai a agelu a te Atua o fakamalosi ki a ia (Luka 22.43-44). I kona foki e iloa, ne fakamalosi ne ia a te tokotolu soko kola ne olo mo ia o ‘talo me ‘to a olotou moe. Ana muna, “Ke matapula’pula koutou kae ‘talo, ke moa e paku atu koutou ki fakaosoosoga. E malosi te agaga kae vaivai te foitino.”

Mea a’koga mo fakamāina ei a te mataupu:

- Fakamatala a te tala i te mea ne tupu i te Faatoaga o Ketesemane Fakaaoga a mau o nisi fai Evagelia mo faka katoatoa a te Mataupu.

Fakatomuaga:

E isi se tamaliki e masani o ‘talo ki te Atua manafai ko pokotia tena olaga ko maua ne fakalavelave? A te mataupu a tatou i te Aso Tapu tenei ko te tala o Iesu i te faatoaga o Ketesemane. Ne fakafeagai a Iesu mo ona

puapuaga mo ona fakalavelave. Ne gafuia kae afutoto ona ko tena fita. Ne `talo a Iesu ki tena tamana ke maua ne ia a fakamalosiga.

Akoakoga:

Mai te tala kooti ne fakalogologo tatou ki ei, ko fakamasaua mai kia tatou tamaliki ke tumau o tautali ki kalafaga o Iesu i tena toe laga i te olaga nei. I te mauga o Ketesemane e lavea ne tatou a te ata e aoga kae taua ki te olaga tupuake o taua. A Iesu ne `talo fakatolu ki tena tamana mo se fesoasoani ke ave keatea a te ipu `kona mai ia ia. I te `talo a Iesu e lavea ne taua a te olaga fakalogo o te Aliko, i te manavaga fakaoti o tena `talo; fai mai "e se fai tena loto kae ko te loto o tena Tamana. Ke pena tatou tamaliki ke fakalogo tatou ki akoakoga a Iesu. Ke fakakoako taua ki uiga o te Aliko, ke fai ne taua a te loto mo te finagalo o te Atua.

Mea fai a Tamaliki:

Faka koneseti a mea ne fai ne Iesu i te faatoaga o Ketesemane

Fuaiupu Tauloto: Maleko 14:38 "Tela, fai atu Iesu kia latou, "ke mata-pulapula koutou kae `talo, ke moa e pa'ku atu koutou ki te fakaosoosoga. E malosi te agaga, ka ko vaivai te foitino"

Pese: Fili i te tusi pese

Talosaga: Fakafetai te motou Aliko Iesu, mo ata e aogaa kae taua e lavea ne matou i tou olaga sau katoa. Matou e talo atu ke fesoasoani mai kia matou ke ola i a matou a te loto mo te agaga fia tautali ki au kalafaga. Amene.

ULUTALA 17: KO TE FAKALATĀGA O IESU.

Pogai: Fesoasoani ki tamaliki ke iloa ne latou me ia Iesu ne fakalata ne Iuta ki Faitaulaga Pule mo tino pulepule o te Malo o Loma.

Tusi Faitau: Mataio 26:47-56

Fakatokāga mô Faia'koga:

A Iuta Isikaliota ne fakalata ne ia a tona faiakoga ko Iesu; a ia ko te tamaliki tagata Simona Isakaliota kae se tokotasi o te tinoagafulu mo te tokolua soko o Iesu, kae ko ia fua te soko e tokotasi tela ne vau mai i Iutaia. A Iuta ko te teutupe o te kau tautali i a Iesu (Ioa.12:5-6; 13:29)

kae e seai loa se fakamatalaga e fakaasi mai i ei te pogai ne fakalata ne ia a Iesu.

E lavea lei me i a Iuta ne manatu me ka fakamasinoga a Iesu ne Faitaulaga fua; kae i te okoga a te fakamasinoga ki tulaga faka polotiki o Loma i a Pilato; ne oko a te salamo ki a Iuta tela ne taumafai i ei a ia o toe fai se aofaga mo fakasao a Iesu (Mata.27:3-4) kae ko taumuli. E tena tonu te pogai ne noa ua i ei a Iuta (Mata.27:5), ne to ki lalo kae ne mapa mo tona tinae (Gal.1:18).

Mea a'koga mo fakamāina ei a te mataupu:

- Fakamatala te tala e uiga mo te fakalataga a Iesu
Fakaaoga a mau o nisi fai evagelia mo fakamaina te Mataupu

Fakatomuaga:

Ko oi te tamaliki kooti ne fakalata ne Ia a tena taugaso/Faiakoga?. A te tala ka fakalogologo tatou ki ei i te Aso Tapu tenei ko te tala i te fakalataga ne Iuta a Iesu. A Iuta se tokotasi o soko o Iesu tela ne mafuta fakatasi mo latou i te mafutaga faka soko i aso e uke. Ona ko Iuta se soko tokotasi, tela la, ko taku a Ia se taugaso o te tinogalufulu mo te tokotasi mo te Aliko. Ne mafuli fakaatea a mafaufauga o Iuta kae kau mo Faitaulaga Sili mo tino Pulepule o Loma kola ne taumafai o fakalata a Iuta. Ne fakalata ne ia a Iesu ki lima o Faitaulaga Sili mo tino pulepule o te Malo o Loma.

Akoakoga:

Mai te tala tela kooti ne fakalogologo tatou ki ei, ko fakaasi mai kia tatou tamaliki a te ata mataga kae faka fanoanoa loto i te mafutaga a te Kau soko. A Iuta se soko tokotasi tela ne ola kae mafuta fakatasi mo te Aliko. A Iuta ne fakalata ne ia a Iesu i se auala masei. A Iuta ne 'togi ki tupe ne Faitaulaga ke fakalata ne ia a Iesu. Ko akoako mai kia tatou tamaliki, ke se fakaakoako ki te mea ne fai ne Iuta. Ke se fai taugaso fakaloilo, kae ke se fakalata ne tatou a nisi tino. me i te Atua e manako ko tatou ke ola fealofani mo tou taugaso. Se ko taugaso fua kae pela foki mo tou Faia-koga. Ke ola faka'logo kae ke a'lofa fakamaoni tatou kia latou.

Mea fai a Tamaliki:

- Faite se Tala o te fakalataga ne Iuta te Isakaliota a Iesu
Usu Pese

Fuaiupu Tauloto: Efeso 4:32 " E 'tau mo koutou o fakatau'alofo kae fakatau atafai; ke fakatau fakamagalo foki koutou, e pela eiloa mo te Atua ko oti ne fakamagalo ne ia koutou ia Keliso"

Pese: Fili i te tusi pese

Talosaga: Te Atua te motou tamana faka te lagi, fakafetai matou mo tou alofa tauanoa mo te lalolagi katoa. Fakafetai matou mo Iesu Keliso mo tena olaga kufaki tela ne talia katoatoa ne ia agasala mo amioga masei. Se gata fua i ei kae ne fakalata ne ia a Iesu. Ko agasala matou kae ko fakamaulalo atu ke fakamagalo mai matou i te toto o Keliso, te motou Aliko mo te motou fakaola e tokotasi. Amene.

ULUTALA 18: KO TE FAKAMASINŌGA O IESU.

Pogai: Ke fakaasi ki tamaliki ke iloa ne latou a te faigata mo te se tonu o te fakamasinōga o Iesu.

Tusi Faitau: Luka 23:1-5

Fakatokāga mô Faia'koga:

A Ponitio Pilato ko te kovana Loma telane fakamasino kae fakasala ne ia a Iesu ke fakasataulogina. A ia ko te lima o kovana o Loma ke pule i Iutaia kae ko te tokolua o kovana kola ne leva te taimi ne galue i ei a ia i Iutaia mai te (A.D.26-36). A Pilato ne galue i te taimi o Ioane te Papatiso, i taimi o Iesu, mai i taimi ne galue i ei ke oko ki tona mate mo toetu manumalo.

A Pilato ne lasi a tena tusaga i te fakamasinoga (Mata.27:1-2, 11-26; Male.15:1-15; Luka.23:1-25; Ioa.18:28-19:16; Galu.3:13; 4:27; 13:28; 1Timo.6:13) mo te fakataunuga o loto o tino kola ne manako ke fakasataulo a Iesu.

Mea a'koga mo fakamāina ei a te mataupu:

Fakamatala te Tala o te Fakamasinoga a Iesu ne Pilato

Fakatomuaga:

Tamaliki kai lavea ne koulua a te tino e tu i mua o te fono faamasino o fakamasako ana sala? A te tala ka fakalogologo tatou ki ei, i te Aso Tapu tenei; ko te tala i te fakamasinoga a Iesu ne Pilato. A Iesu e se se tagata

agasala, kae ne tu o tali a tu ki fakamaseiga o tino Iutaia kia ia.

Akoakoga:

E manino mai i te tala me ia Iesu ne tu i mua o Pilato. I te tulaga faka Kovana o Pilato kae ko ia foki e fakaiku ne ia a so se fakamasinoga o te fenua ko Iutaia. Ne iku ia Pilato ke fakasaoloto a Palapa kae ke faka sa-taulo a Iesu. E lavea ne tatou i konei tamaliki me i te fakamasinoga a Iesu e se agasala. A Palapa tela se tagata agasala ko fakasaoloto kae ko fakasataulo a Iesu. Ko te loto mo te finagalo o te Atua ke ofo atu tena Tama e tokotasi ke mate. A Iesu ne seki foki ki tua kae ne fai eiloa a te loto mo te finagalo o tena tamana. Ke pena tatou tamaliki, ke moa e foki tatou ki tua manafai e iloa ne tatou mo te mautinoa tonu a te mea tonu, kae maise manafai e fai ne tatou se galuega alofa.

Mea fai a Tamaliki:

Usu Pese

Fuaiupu Tauloto: Ioane 14:15 " Kafai e a'lofa mai kouto kia au, ke tausi la aku poloakiga"

Pese: Fili i te tusi pese

Talosaga: Fakafetai te Atua mo te loto malosia o Iesu ke fakafeagai ne ia a puapuaga ke oko ki ona fakamasinoga. E fakaasi mai ei a tou loto mo tou finagalo me e tau eiloa a ia o mate ke fakamagalalo o motou agasala. Amene

ULUTALA 19: KO TE FAKASALĀGA O IESU.

Pogai: Ke fesoasoani ki tamaliki ke lavea ne latou a te faigata mo te `mafa o te amoga ne amo ne Iesu kae maise a tona Sataulo i tena auala ki Kalevalia.

Tusi Faitau: Ioane 19:16-27

Fakatokāga mô Faia'koga:

A uiga fakamotu-loto, ko muna-masei, muna-loi mo amioga setonu katoa ne fai ki a Iesu i taimi o te fakamasinoga, te fakasalaga ke oko ki tona mate ko toe logomaega tafasili i masei. Ka tuku tasi a mea katoa kona,

fakatasi mo te mataga o tena mate i te sataulo ko taku a mea kana ko te 'sataulo ne amo ne Iesu'.

A te Sataulo se lakau fakalava tela e fakasala i ei a tino tafasili i te masei a olotou uiga mo faiga. Te sataulo e atagina i ei te mate fakalumaluma i tu mo aganu faka Iutaia. Ne mafa malosi ki a Iesu te sataulo o ia ona ko te vaivai o tona foitino i pago mo kini kola ne fai ne sotia Loma ki a ia.

Mea akoga mo fakamaina ei a te mataupu:

- Fakamatala te tala i te Faka satauloga o Iesu.
 - Puke mai a fakamatalaga mai nisi fai Evagelia o fakamaina a te mataupu
- Fakaaoga a te Ata o te faka satauloga o Iesu

Fakatomuaga:

Kooi te tamaliki kooti ne lagona ne ia te tala i te Fakasatauloga o Iesu? A te tala ka fakalogologo tatou ki ei i te aso nei ko te tala o Iesu i te faka-satauloga ne sotia o Loma. Mai tua o tena fakamasinoga ne te Kovana ko Pilato, ne iku ei ke faka sataulo.

Akoakoga:

E maina i te tala me ia Iesu ne faka sataulogina i tuapa o Kolokota. A puapuaga ne fakafeagai mo Iesu, fai mai me ne talia katoatoa ne Iesu a ona puapuaga. I te taimi ne faka sataulo ei a Iesu ne seki fakafiti kae ne kufaki eiloa. Kafai e mafaufau tatou ki te mea ne fai ne Iesu, ailoga e isi se tino i te lalolagi tenei e mafai ne ia o fai pela mo Iesu. E seai se tino e mafai ne ia o kufaki a mea 'se o te sua tino. E seai foki te tino e fiafia o mate mo te sua tino. Tela la, e 'tau mo tatou tamaliki o kufaki kae loto fakamagalo ki nisi tino ko te mea ke fiafia mai te Atua kia tatou.

Mea fai a Tamaliki:

Usu Pese

Fuaiupu Tauloto: Epelu 10:36 "E 'tau koutou o kufaki ko te mea ke fai ne koutou a te loto o te Atua, ke maua te mea ne folafola mai"

Pese: Fili i te tusi pese

Talosaga: Te motou tamana faka te lagi ko avatu ne matou ou vikiga mo ou tavaega i te aso fou tenei ko aulia manuia ne matou, fakafetai mo te Sataulo fakamagalo o Iesu Keliso tela ko mafai ei ne tino katoa o

maua a te fakaolataga e auala i te talitonu ki te Sataulo fakamagalo o Keliso. Amene.

VAEGA 4: KO TE MATE MO TE TOETU MANUMALO O IESU.

ULUTALA 20: KO VALOAGA A IESU MÔ TENA TOETU MAI

Pogai: Ke fakaasi ki tamaliki ia Iesu ne `valo e iloa ne ia a tona toetu kae koi tuai a ia o mate.

Tusi Faitau: Maleko 10:32-34

Fakatokāga mô Faia'koga:

A Iesu e iloa lei faeloa ne ia a mea ka tupu ki a ia; e iloa ne ia mai te kamataga me koi ka fakalata ne ia a ia (Ioane 6: 64, 13: 11, 18: 4); e iloa ne ia te taimi ko tau mo ia o foki ki tona tamana (Ioane 13: 1); e iloa ne ia me ka fakafeagai a ia mo fakalavelave lasi mo puapuaga e uke (Maleko 8: 31, Luka 9: 22, 12: 50, Ioane 3: 14); Ne valo foki ne Iesu a tena toetu mai i te mate (Male.10:34). Te iloa ne Iesu a mea kola ka tupu mai mua e fakaasi mai ki a tatou me i a Iesu ko te Atua foki loa a ia, tela ko tonu ei te molimau a Mataio 1: 23 ... ka fakaigoa a ia ki a Emanuela, ko tona uiga, "Ko i a tatou te Atua."

Mea a'koga mo fakamāina ei a te mataupu:

Te ata o te toetu o Iesu #88

Fakatomuaga:

E mata e isi se tamaliki kai logo me lagona ne ia se tino ne iloa loa neia tena aso mate mo tena aso toetu? Ia fakalogo mai la ke iloa ne koutou te tino tenei kae tokotasi loa foki a ia ne iloa loa neia tena aso mate mo tena aso toetu.

Akoakoga:

Te iloa ne Iesu o mea ka tupu mai mua ki a ia e fakamaonia i ei i a ia ko te Tama loa a te Atua tela ko toka o fai te loto o tena Tamana. Te malaga a ia ki Ielusalema ko fakatu e pela mese ata o te tino tela e fano mai te saogalemu ki te faigata, te filemu ki te fakamataku. Se malaga e vau mai i te faigofie ki te olaga mafa mo te fanoanoa. A mea konei ne fai ne Iesu ona ko tena fakalogo muna mo tena toka o fai te loto o tena Tamana.

Mea fai a Tamaliki:

Lomi te ata o Iesu i tena toetu mai te mate

Fuaiupu Tauloto: Luka 18:32-33

Pese: Oh! How I love Jesus.....(fili i te tusi pese)

Talosaga: Iesu fakafetai me ko koe loa te Atua e iloa ne koe mea katoa i te lalolagi nei. Amene.

ULUTALA 21: KO TE TANŪGA MO TE TAUSIGA O TE TANU

Pogai: Ke akoako a tamaliki ke onoono ki a Iesu tela ne mate kae ne toetu manumalo.

Tusi Faitau: Mataio 27:57-66

Fakatokāga mô Faia'koaga:

A Iosefa te Alimataia ne fanoi ne ia te foino o Iesu ko te mea ke tanu ne ia. A Iosefa e taku ne Mataio me se tagata maumea ako Maleko (15: 43) e taku ne ia me se tino o te Fono kae lasi a tona fakaaloaloga; a ata e lua kona o Iosefa e fakaasi i ei te tulaga o te soko tenei i te sosaite tela e kau i ei. Alamataia kote fakai o Iosefa tela e sefulu lima maila ki te faitu ki te saegala o Iopa.

A tanuga e masani o kati i te papa i te faitu mauga io mese ana ke fai mo tanuga o te kaiga. Te tanuga o Iosefa se tanuga tela e seki fakaaoga e iloa kae ko tanu ki ei a Iesu. Te failoga o te malo o Loma tela ne fakapiki ki tanuga ke moa e tala ne se tino, ko te fakamailoga o te pule sau katoa a te malo Loma kae fakamalu ne tino katoa. Te tala e uiga mo sotia tausi o te tanuga e maua foki i tusitusi faka Apokalifa tela e fakamaoni ei te taumafaiga a te fili o fakaseai kae fakase foki te tala o te toetu manumalo o Iesu tela ko te ivi-tua o te Tala Lei.

Mea a'koga mo fakamāina ei a te mataupu:

- Te ata o te tanuga o Iesu
- Se ata o te tanuga i Tuvalu

Fakatomuaga:

Kamata te akoakoga ki te fesili ki tamaliki me koi ko oti ne lavea ne ia se tino tela ne mate kae ko toe ola mai?

Akoakoga:

Te mate o Iesu, te tausiga o tena tanuga ne sotia, ke oko ki tona toetu mai te mate i tolu o aso, ko fai mo fakaasiga manino tela e lavea i ei ne te lalolagi me i a Iesu ne manumalo i te mate, i togafiti masei a tino lotu masei e pela mo faitaulaga mo Falesaio pela foki mo te failoga a te malo o Loma tela ne fakapiki i tona tanu ke moa e talagina a tona tanuga ne sose tino. Ako taumafaiga katoa konei ne seki mafai o taofi ne latou a Iesu i lotu i te tanuga. Ne ofa ne te Atua a taumafaiga ate fili ki te mafuie fakamataku tena ne siga ki lalo a sotia tausi o te tanu o Iesu e pela mene tino mate. Ka pena foki o manumalo a sose tino tautali i a Iesu mafai e mautakitaki a tona fakatuanaki i a ia.

Mea fai a Tamaliki:

Lomi te ata o te tanuga o Iesu, lomi foki te ata o te tanuga ikonei i Tuvalu. Tusi ki lalo me ne a a mea e lavea ne koutou e kesekese iei a tava tanuga konei.

Fuaiupu Tauloto: Mataio 27:60 "Ne ave ne ia te foitino o Iesu o tuku I lotu I te tanuga ne tuki I kaupapa, fakateka atu ei a te fatu lasi o 'pono I te gutu o te tanuga"

Pese: God's not dead.....

Talosaga: Iesu fesoasoani mai ke tumau omotou fakafatuanaki kia Koe kote mea ke toetu manumalo koe i omotou lotu. Amene.

ULUTALA 22: KO MEA NE TUPU I TE TAIMI NE MATE EI A IESU

Pogai: Ke Fesoasoani ki tamaliki ke iloa ne latou a mea ne tupu i te matega o Iesu

Tusi Faitau: Mataio 27:45-56

Fakatokāga mô Faia'koga:

Mai mua o te matega o Iesu, ne pouli a te fenua e tusa mo te tolu itula. I te itula e tolu i te afiafi, ne kalaga a Iesu, "Eli, Eli lama sapatani. Ko

tona uiga, "Toku Atua, toku Atua kai ia ko tiaki mai au ne koe." A nisi tino ne `tu i kona ne fakatauemu ki a Iesu, kae fai ake penei, "Ko kalaga ki a Elia".

Ne kalaga a Iesu mo te leo maluga penei "Toku Tamana, ko tuka atu ne au toku agaga ki ou lima!" (Luka 23.46). Ne tagi pakalaga a Iesu, ko te mea e iloa ko mate. I te itula tonu ne mate ei a Iesu, ne masae lua a te laugatu o te `pui o te Fale Tapu, mai luga ki lalo (Maleko.15.37 &38).

A te Tusi Tala o Mataio ne fakamatala ne ia i te taimi tonu ne mate ei a Iesu, me ne galulu te laukele kae ma'fa kaupapa. Ne lavea ne te takitaki o te tokoselau mo te sotia ne leoleo i kona te mafuie mo mea katoa ne tupu i te matega o Iesu, ko oko e iloa i te ma'taku kae fai ake:" E tonu, ko te tama e iloa tenei a te Atua." Ka ko nisi tino i te laveaga ne latou a mea ne `tupu, papa ei olotou fatafata kae foki ki olotou kaiga.(Luka 23.48)

Mea a'koga mo fakamāina ei a te mataupu:

- Fakamatala a te Tala i te matega o Iesu i te Evagelia a Mataio 27.45-56

Fakaaoga a mau o nisi fai evagelia o fakamaina a te mataupu.

Fakatomuaga:

Tamaliki, kai lavea ne koulua a fakailoga o te mea ne tupu? A te tala ka fakalogologo tatou ki ei i te Aso Tapu ko te tala mea ne tupu i te taimi ne faka sataulogina i ei a Iesu.

Akoakoga:

Mai te tala kooti ne fakalogologo tatou ki ei ko fakaasi mai tamaliki me e uke a mea ne `tupu i te matega o Iesu. E fakaasi mai ei me ia Iesu ko te Tama e iloa a te Atua e tokotasi tela ne vau mai luga ke mate mo te lalolagi katoa. E lavea foki ne tatou a te mana mo te fakafoofogina o te Atua i mea katoa. Mai fakailoga mo mea ne `tupu kola ne molimaugina ne fai evagelia; e fakapatonu ei me i te Atua ne seki tuku tiaki ne ia a tena Tama. E uina e iloa a Iesu ne mate fakaalofa mo te lalolagi agasala, kae ne fakaasi ne te Atua a fakailoga ke lavea ka eke talitonu foki ki ei a tino ne tu i tafa o tena Sataulo. Tela la, mo tatou tamaliki, e `tau ke lavea ne tatou a te loto mo te finagalo o te Atua ke maua katoatoa ne tatou a te ola.

Mea fai a Tamaliki:

Usu Pese

Fuaiupu Tauloto: Ioane 3:16 "mene pena eiloa o alofa mai te Atua ki te lalolagi, ne tuku mai iei ne ia tena Tama e tokotasi ko te mea kese malaia sose tino e fakatuanaki kia ia , kae ke maua ne ia ate ola se gata mai"

Pese: Fili mai te tusi pese

Talosaga:

Fakafetai te Atua mo fakailoga ne lavea ne te lalolagi i te taimi ne mate ei a Iesu i luga i te Sataulo. Ko fakaasi mai kia matou a tou iai mo tou kau fakatasi mo Iesu mai tena fanau mai ki te lalolagi ki tena mate mo tena toetu manumalo. Amene

ULUTALA 23: KO FAKAASI ATU A IESU KI A MALIA TE MAKATALA

Pogai: Ke fakamatala ki tamaliki me i a Malia te Makatala ne lavea mua-mua ne ia a Iesu

Tusi Faitau: Ioane 20:11-18

Fakatokāga mô Faia'koga:

A Malia te Makatala i te molimau a Ioane (20:11-18) ko te fafine mua-mua ne lavea ne ia a Iesu. A Makatala e lavea i meafai mo meatupu me e pela me ko te takitaki o fafine katoa kola e tautali sale ia Iesu kae fesoasoani o tausi a latou mai olotou mea totino. Ko ia foki loa tenei ne tuli ne Iesu a agaga masei e toko fitu mai i a ia. E molimau foki ne Luka, i a Malia te Makatala mo fafine ne nofo fakatasi mo Iesu mo ona Soko i Kalilaia (Luka 8: 1-3).

A Malia te Makatala se tokotasi ne molimau ne ia a te mate o Iesu (Maleko 15: 40-41; Mataio 27: 55-56, 61; Luka 23: 49; Ioane 19: 25), te tanuga tela e seai se foitino mate i ei (Maleko 16: 1-6; Mataio 28: 1, 6; Luka 24: 1-3, 10; Ioane 20:1-2) ne maua ne ia te tala o te toetu kae ne fakailoa ne ia ki Soko (Maleko 16: 6-7; Mataio 28: 5-9; Luka 24: 4-10). Ne seki talia a molimau a fafine i te taimi muamua, kae fakamuli ifo, ne taliagina (Luka 24: 11, 22-48) a ko Ioane (20: 11-18) e molimau i a Iesu ne fakaasi muamua loa ki a Malia te Makatala kae ne faipati ki a ia e uiga mo tena fano ki tena Tamana.

Mea a'koga mo fakamāina ei a te mataupu:

Te ata o Iesu i tena fakaasi atu ki a Malia te Makatala

Fakatomuaga:

Se a tau lagona mafai e fakaasi atu ki a koe se tino ko oti ne mate?

Akoakoga:

A Malia te Makatala ne fakalei kae fakafou a tena olaga ne Iesu tela ne tavini fakamaoni ei a ia ki a Iesu mo te faiga o tena galuega. Mai i tena olaga tavini fakamaoni ki tona Aliko tela ne tagi sale ei a ia mo te lotologomae i te mate o tena Aliko. Ne seki vaivai a tona loto i te mea ne tupu kae ne fano loa a ia ki te tanu o Iesu i te lua o taimi e pela mo te molimau a Ioane. Ne fataui a laua mo Iesu tela ne fuli ne ia a tona loto fanoanoa ki te fiafia mo te fakamoemoega ki te ola e se gata mai.

Mea fai a Tamaliki:

Fakakoniseti te tala tenei

Fuaiupu Tauloto: Ioane 20:17

Pese: Down in the valley with my Savior...(io me fili mai te tusi pese)

Talosaga: Iesu fesoasoani mai ke fai matou pela mo Malia te Makatala o sala atu kia koe i taimi katoa omotou olaga. Amene.

ULUTALA 24: KO FAKAASI ATU A IESU KI TE TINOAGAFULU MO TE TOKOTASI.

Pogai: Ke fakamalosi a tamaliki ke kilo ki pakiaga i lima, vae mo te kao-kao o Iesu e pela mo te kiloga foki a te tinoagafulu mo te tokotasi soko.

Tusi Faitau: Luka 24:36-49

Fakatokāga mô Faia'koga:

Te fakaasiga a Iesu ki Apositolo ne auala i se faifaiga fakafoofogia tela ne poi i ei a Apositolo. I manatu masani o tino ko agaga masei fua io me ko aitu e mafai ne latou o ulu ki se potu tela e pono fakalei; tena te mea ne matakū ei a Soko o Iesu i te gaki atu o Iesu ki a latou i te potu tela ko oti ne ponopono. Ko fakaasi ne Iesu me sili atu a ia i aitu mo agaga

masei me i aitu mo agaga e seai ne olotou foitino kae e se mafai o kai i mua o tino.

Ne lavea ne soko a pakiaga i vae mo ana lima, kae ne seki talitonu poi kae ofo

Mea a’koga mo fakamaina ei a te mataupu:

Te ata i te fakaasiga atu a Iesu ki ana soko konei e tinogafulu mo te tokotasi

Fakatomuaga:

Tamaliki kafai e isi sou taugasoa lei ko mate e mata e isi se aso e nofo tokotasi koe o mafaufau kiei kae fia lavea ne koe?

Akoakoga:

Ko fakaasi ne Iesu ki ona Soko te malosia tela ne toetu mai ei a ia mai te mate i te mafai ne ia o ulu ki te potu tela ko oti ne pono pono fakalei. Ko fakaasi foki ne Iesu ki ona Soko me tena te malosia ka fakagata ki ei te matakua tela ne muni ei a latou i potu pono pono kae ka fai mo mea e fakamalosi ki ei a olotou loto kae ke olo a latou mo te iloa mautinoa o takutaku atu a Iesu tela ko oti ne toe tu manumalo i olotou olaga.

Mea fai a Tamaliki:

Fakakoniseti te tala tenei

Fuaiupu Tauloto: Luka 24:36 “Ka koi tala atu ne laua a mea konei, e ‘poi e iloa ia Iesu ko tuu i loto ia latou, ana muna, “Ke ia koutou a te filemu”

Pese: Onward, Christian soldiers(io me fili I te tusi pese)

Talosaga:

Iesu ke fai matou pela mo ou soko konei ke lavea gofie ne matou a koe i sose koga kae ke talitonu foki matou kia koe i taimi katoa omotou olaga tupuake. Amene.

ULUTALA 25: KO FAKAASI ATU A IESU KI A TOMA

Pogai: Ke akoako a tamaliki ke se fai a latou e pela mo Toma i te fui talitonu

Tusi Faitau: Ioane 20:24-29

Fakatokāga mô Faia'koga:

A Toma se soko kae se Apositolo foki o Iesu tela e fakaigoa ki te Masaga i te Evagalia a Ioane (11: 16; 20: 24; 21: 2) ka e lavea foki a tona igoa i fakasologa o apositolo i a Mataio 10: 3; Maleko 3: 18; Luka 6: 15; Galuega 1: 13. Ne fakaasi te lotu malosi o Toma i te fakamalosi ne ia a soko ke olo fakatasi a latou mo te olotou Faiakoga ki Iutaia ke mate fakatasi a latou mo ia (Ioane 11: 16). Fakamuli ifo, ne fakaasi tonu ne ia te mea e se iloa ne ia te koga e fano ki ei a Iesu (14: 5), a ko te tala o te aso nei ko fakaasi ne Toma te faigata mo ia o talitonu ki se tala e uiga ki tino ne mate, ne tanu, kae i te tolu o aso kae toe ola mai. Ne fatoa talitonu a Toma me i a Iesu ko toetu mai i te laveaga ne ia a Iesu kae puke foki ona lima ki koga kola ne tuki ki fao mo tena kaokao tela ne velo ki tao.

Mea akoga mo fakamaina ei a te mataupu:

Te ata o Toma mo Iesu e fakasae ana pakiaga kia Toma ke talitonu

Fakatomuaga: Kooi tamaliki e talitonu ki agaga?

Akoakoga:

A Toma ko fakatu pela mese ata o tino kola e sala ki failoga mo mea faka-oofoofogia e uga ki a Iesu ko fatoa talitonu ei ki tena toetu manu-malo. Ako Iesu ne fakamalosi ne ia a Kelisiano o aso nei me amutia a tino kola e talitonu kae e seki lavea ne latou a ia. i so se taimi e lavea ei ne koe, ne au, ne tatou katoa a Iesu i tou olaga fakatuanaki ka fakapatonu foki ei ne tatou i kona i a Iesu ko tou Aliko mo tou Atua.

Mea fai a Tamaliki:

Tusi ki lalo me sea tou lagona mafai ko Toma koe kae fakaasi atu a Iesu kia koe?

Fuaiupu Tauloto: Ioane 20:29 "Muna Iesu kia ia, "Ea, ko talitonu koe I te mea ko lavea mai ne koe au? Amutia latou kola e se lavea mai ne latou au, kae talitonu mai e iloa"

Pese: Never alone.....(io me fili mai te tusi pese)

Talosaga:

Iesu fesoasoani mai ke sasale faeloa tatou i taimi katoa ko te mea ke se

toe fakafesili ne matou koe i omotou olaga kae talitonu faeloa kia koe tokotasi. Amene.

ULUTALA 26: KO FAKAASI ATU A IESU KI A PETELU

Pogai: Ke akoako faka'lei ki tamaliki me ia Petelu se tino tela e pokotia ne vaivaiga o te olaga kae e loto malosi foki o tavini atu ki te Alik.

Tusi Faitau: Ioane 21:1-14

Fakatokāga mô Faia'koga:

Te Namō o Kalilaia (Mataio 4:18; 15:29; Maleko 1:16; 7:31) e fakaigoa foki me ko te Namō o Tipelio (Ioane 6:1; 21:1), io me ko te Namō o Kenaleta (Luka 5:1). Tenei foki loa te namō tela ne kalagagina i ei a Simona Petelu mo tona taina ko Anitelea ne Iesu ke tautali atu i a ia. I fakaasiga a evagalia katoa a Simona Petelu se tino faika mai te fakai o Kapanaumi, ko laua mo tena taina ko soko muamua loa kola ne kalagagina ne Iesu, kae e iloa fua i a ia se tino Kalilaia i tena faipati (Maleko 14:70; Mataio 26:73; Luka 22:59. A ia se tino avaga (Maleko 1:30; Mataio 8:14; Luka 4:2; 1Kolinito 9:5) a ko te matua o tena avaga e nofo latou. A Petelu ne fakaigoa ne Iesu ki a Kefa, a tona uiga ko te Kaupapa (Ioane 1:42). A Petelu mo te soko tela e alofa ki ei a te Alik ne tele i te taeao malu o asi te tala me ko oti ne ave ne latou te foitino o Iesu keatea (20:1-10). I te fakaasi atuuga a Iesu ki a Petelu i te Namō o Tipelio ne seki iloa ne Petelu me ko Iesu tela e kalaga atu mai te kaugutu o te namō.

Mea a'koga mo fakamāina ei a te mataupu:

Te ata o Iesu i tena fakaasi atuga ki a Petelu

Fakatomuaga:

Tamaliki kafai e fanatu se tino maluga ki tou fale i se aso ka ko koe la e tafao kae lavea ne koe, e mata e tiaki au tafaoga mo ou taugasoa kae tele koe ki te fale ki te tino maluga tela e vau ki tou fale?

Akoakoga:

A Simona Petelu se tautai masani o te Namō o Tipelio kae toe takitaki ne ia te kau-soko konei ke foki a latou ki te namō o faika. Ne tupu te mea nei ako Iesu ko oti ne mate. Te tautai o te namō ne se poa a tena vaka i te po katoa tena. E se gata i kona e se lavea foki ne Petelu mo soko me

ko Iesu tela e faipati atu ki a latou. Kae ne poa te vaka faika o Petelu i te taeao mai i te fakalogo ki a Iesu. Ko akoako mai nete tala tenei me i te Kelisiano tela ko toe foki ki tona olaga mua ko te Kelisiano tela ko mate a Iesu i tou olaga fakatuanaki. I te sua feitu, a te fakalogo ki a Iesu tiga i ei te olaga ne se, ka toe maua ne koe a fakamanuiaga e tafasili atu i te taimi muamua. E fakamasaua mai foki me ko fakamanuiaga penei e toe lavea lei ei ne tou fakatuanaki a Iesu toetu manumalo.

Mea fai a Tamaliki:

Lomi te ata o Petelu i luga i te pooti mo tena tili.

Fuaiupu Tauloto: Ioane 21:7

Pese: When we walk with the Lord.....(fili mai te tusi pese)

Talosaga:

Iesu ke fai matou pela mo Petelu ke tiaki a mea se aoga o te olaga kae tautali atu matou kia koe mo te loto talitonu kae fakatuanaki. Amene.

ULUTALA 27: KO FAKAASI ATU A IESU KI TE TOKOLUA I TE AUALA KI EMAU

Pogai: Ke akoako a tamaliki ke iloa ne latou me i nisi taimi ko puli ia ta-tou a Iesu ona ko tatou ko se talitonu mo te fakamaoni.

Tusi Faitau: Luka 24:13-35

Fakatokāga mô Faia'koga:

I te fakamatalaga a te evagalia ko Luka a Emau se fakai foliki tela e 7 maila te mao mai i Ielusalema, ako tusitusi faka-Palesitaina e fai pela me 20 maila mai ki te togala o Ielusalema. I te faitau e 16 "ka ko fakasegi o la mata" se galuega fakafoofogia ne fai ne Iesu ke moa e lavea ne tokolua konei a ia. I te faitau e 32 ne ofo a laua me kaia e seki lagona ki o la loto ana muna i te fakamatalaaga ne ia ki a laua a te Tusi (Tusi Tapu tela ko te Feagaiga Mua fua). Te faitau e 21 e fakamatala i ei te uiga o te Mesia tela ko te "fakaola o Isalaelu" tela ne fakana malosia a latou ki ei, a ko te sataulo ne fakagata ne ia a te fakamoemoega o soko mo laua konei ko foki ki Emau. I te faitau e 30 ko te faifaiga e fai sale ne Iesu tela ko iloa lei ne ona soko.

Mea a'koga mo fakamāina ei a te mataupu:

Te ata o Iesu e sasale mo laua konei i te auala ki Emau

Fakatomuaga: Tamaliki ka fai koe e sasale mo ou taugasoa i te auala kae fakaasi atu Iesu e mata e lavea ne koe me ko oi a ia?

Akoakoga:

Ne seki mafai ne tokolua soko konei o lavea a Iesu tiga loa te olotasi kae sautala foki a latou ona ko oti ne fakasei ne Iesu a la mata, i te sua feitu, ona ko te se maina a laua i muna o te Tusi (Tusi Tulafono ko te Feagaiga Mua) ko se iloa ei ne laua a mea konei ko tupu i Ielusalema e pela mo tusitusiga a Mose mo Pelofeta. E pena foki loa a tatou i aso nei, ko fai-gata mo tatou o lavea a Iesu ona ko te se faitau o tatou ki Tusi Tapu tela ko se iloa ne tatou a mea konei e tupu i aso nei kae maise loa ko se iloa ne tatou te kano loto o Iesu mo tatou.

Mea fai a Tamaliki

Fakakoniseti te tala

Fuaipu Tauloto: Luka 24:19e

Pese: Come and go with me.....(fili mai te tusi pese)

Talosaga:

Iesu fesoasoani mai ke sasale tasi faeloa tatou i aso katoa ko te mea ke pili matou kia koe i omotou olaga nei. Amene.

VAEGA 5: KO FANAKE A IESU KI TE LAGI MO TE GALUEGA FAKATONUGINA.

ULUTALA 28: AKOAKO KAE PAPATISO A TINO KATOA

Pogai: Ke fakamatala ki tamaliki me i te akoako atu o te Muna a te Atua ki a latou se fakatonuga a Iesu ne tuku mai.

Tusi Faitau: Mataio 28:16-20

Fakatokāga mô Faia'koga:

“Olo atu koutou ki fenua katoa” te faipatiga a Iesu e uiga ki te Tala Lei ke ave ki fenua katoa. Ko tino ke maua ne latou te avanoa ki te fakaolataga tela ne fai ne Iesu. Ko tino katoa i fenua katoa e tau o fai se filifiliga a latou ki te talia io me ko te se talia ne latou te falaolataga.

“Papatiso atu foki a latou i te Igoa o te Tamana, te Tama mo te Agaga Tapu” – te manatu maluga i konei, ko tino ke papatiso io me fakamailoga ki te Igoa Tapu o te Tamana, te Tama mo te Agaga Tapu. “Ke akoako atu foki ke fakalogo ki mea kola ne fakatonu atu ne au ki a latou” – Ko kalagagina a tatou ke fai pela mene faiakoga o te Tala Lei o akoako a tino mo tamaliki

Mea a’koga mo fakamāina ei a te mataupu:

Te ata o te papatisoga o Iesu ne Ioane te Papatiso

Flash card

Video

Fakatomuaga: E fia a vaega papatisoga e iloa ne koutou tamaliki?

Akoakoga:

A tatou ko soko o Iesu i aso nei i koga e nofo a tatou i ei. Ona ko te fetu tena, ko tau mo tatou o fakalogo ki te fekau taua a Iesu tenei, kae ke olo a tatou o akoako a te Tala Lei kamata i tou olaga, tou tamaliki, tou kaiga, tou tuakoi, mo so se tino, ko te mea ke fai a latou mo soko o Iesu.

Mea fai a Tamaliki:

Lomi te ata o te vaega papatisoga kola e iloa ne koutou

Fuaiupu Tauloto: Mataio 28:18e,19

Pese: Unto Thee oh Lord!!.....(fili mai te tusi pese)

Talosaga: Iesu fakaaoga omotou ola ki tau galuega ko te mea ke ola fiafia matou pela mote mea e loto koe ki ei. Amene.

ULUTALA 29: FAKAASIGA O TE MALOSI O TE ATUA

Pogai: Ke akoako a tamaliki ke iloa ne latou me i te malosi o te Atua e mafai ei ne sose tino o fai a galuega fakafoofogia

Tusi Faitau: Maleko 16:14-18

Fakatokāga mô Faia’koga:

Te malosi io me ko te mana o te Atua ne lavea i fakaasiga kesekese i te Feagaiga Mua mo te Feagaiga Fou. Konei a nai ata e lavea gofie ei te malosi o te Atua. Te faitega ne te Atua te lalolagi ki ana muna (Kenese 1: 3); i te fakasalaga ne ia o tino Aikopito ki mala e sefulu (Esoto 7: 14-11: 10); te malaga a Isalelu i loto i te Tai Kula (Esoto 14: 19-31); ko fagai a Elia ne oleva (1Tupu 17: 1-6). Ko fakamalu ne Iesu te namo sou-sou (Maleko 4: 35-40), ko afuli ne Iesu a agaga masei (Luka 4: 31-37) Paulo ne u ne te gata kae e se mate (Galuega 28: 3-6) te toetu manu-malo o Iesu mai te mate (Mataio 28: 1-10).

Mea a’koga mo fakamāina ei a te mataupu:

Ata #2 - Ne faite ne te Atua te lalolagi

Ata #10 – Ne aumai ne te Atua a te lolo mo fakasala ei a tino se fakalogo ki a ia

Ata #29 - Ne fakamavae ne te Atua a te Tai kula.

Fakatomuaga: Tamaliki kai isi na ne tino e iloa ne koe e malosi kae mana i te lalolagi nei?

Akoakoga:

Te malosi o te Atua e lavea i aso nei i luga i tino talitonu, kae se failoga o te fakatuanaki mo fai a te galuega a te Aliko. Te mana o te Atua e fakalei ki ei a masaki, e afuli ki ei a agaga masei kae tausi ki ei a tou ola mai i te fili mo ana togafiti masei. I te sua feitu, te malosi o te Atua e lavea i galue a te Ekalesia kola ko fuli ei a olaga o tino ki te olaga fou i a Iesu. E lavea foki te malosi o te Atua i tou amioga lei kola e fai, pela foki mo te fakalogo o tatou ki tou matua mo Iesu.

Mea fai a Tamaliki:

Tusi ki lalo a mea katoa e iloa ne latou ne faite nete Atua

Fuaiupu Tauloto: Maleko 16:17,18

Pese: Heavenly Father I appreciate you..... (fili mai te tusi pese)

Talosaga: Iesu fakafetai me ko lavea ne matou a tou malosi mo tou mana i aso katoa omotou olaga fesoasoani mai ke tu mau mai loa omo-

tou fakatuanaki kia koe. Amene.

ULUTALA 30: KO FANAKE A IESU KI TE LAGI

Pogai: Ke fakamatala faka'lei ki tamaliki me i a Iesu ne foki ki te lagi mai tua o tena toetu mai te mate.

Tusi Faitau: Galuega 1:6-11

Fakatokāga mō Faia'koga:

A Iesu ka foki ki te lagi i te mauga o Olive kae au mai ana soko mo te fesili a latou tenei; A soko o Iesu koi manatu loa me i te malo tela e faipati sale ne Iesu se malo faka-te-lalolagi kae ne fakatalitali ki taimi e tuku mai i ei te pule ki a Isalaelu, e tena ne fesili ei a latou ki taimi. Muna Iesu me pule te Tamana i tusaga tena. Te Agaga Tapu ko te tou fesoasoani (Luka 12: 12) tela ne tuku mai ne te Atua e auala i a Iesu (Ioane 14: 26, 20: 22); mo fakamasaua a akoakoga a Iesu ki a latou kola e olo o akoako te Tala Lei i Ielusalema, Iutaia, Samalia, mo te lalolagi katoa. Te Agaga Tapu ne tuku mai ona ko Iesu ka se tumau tena galue mo ona soko me ko foki ki tona Tamana me ko oti te galuega ne vau o fai.

Mea a'koga mo fakamāina ei a te mataupu:

Te ata o te fanakega a Iesu ki te lagi #90

Fakatomuaga: Tamaliki, neâ a mea kola e eva saale i luga i te vanimonimo?

Akoakoga:

E tonu me ko se fakatasi a tatou mo Iesu i te feitu faka-te-foitino kae e ola tasi a tatou mo ia e auala i te Agaga Tapu tela e fesoasoani ke maina a tatou i akoakoga a Iesu. A Iesu ne foki ki tona Tamana kae ne fano o fakatoka se koga mo tatou kae e toe foki mai ke olo tasi a tatou o mafuta mo ia ki te se gata mai (Ioane 14: 1-3).

Mea fai a Tamaliki:

Tusi ki lalo a mea kola e iloa ne latou e eva sale i luga i te lagi?

Fuaiupu Tauloto: Ioane 14:1-3

Pese: Jesus loves me this I know.....(fili mai te tusi pese)

Talosaga: Iesu fakafetai me ia koe ko fano o fakatoka mai se koga gali mo matou tenei matou e kausaki atu kia koe. Amene.

ULUTALA 31 TE ASO OTE TALA `LEI

Pogai: Ke akoako a tamaliki ke maina fakalei me i te Tala Lei ko te tala o te fakaolataga tela ne fuli ne ia a olaga o tino mai te pouliga ki te mainaga o Iesu.

Tusi Faitau: Luka 2:8-20.

Fakatokaga mo Faiakoga:

Te Aso Fiafia o te Tala Lei i Tuvalu e fakamanatu i ei te okoga mai o te lotu io me ko te Tala Lei a Iesu tenei e fakavae kae tausi ne te Ekalesia Kelisiano Tuvalu.

Te aso fiafia tenei e fai i ei te tapuakiga fakapitoa tela e fai i te lua o Aso Tapu o te masina o Mee. E masani o fakamatala a tala o te oko maiga o te Tala Lei ki Nukulaelae mo fenua katoa o Tuvalu. E tenei foki te taimi e fai ei a taulaga tupe a kaiga, fakapotopotoga mo vasega, ke oko ki tino takitokotasi ki te Ekalesia mo fai ana galuega pela foki mo polokalame e atiakega i ei a olaga faka te agaga o tino. E fakasoko te polokalame ki tau-pese i te po mo te fakaala mo faiga fatele i te Aso Gafua.

Mea Akoga mo fakamaina te mataupu:

Ata o Iesu

Ata o faifeau Samoa kola ne galue i Tuvalu

Fakatomuaga:

Fesili ki tamaliki me kaia e se fiafia ei a latou ki lotu mo te akoga i Aso Tapu?

Akoakoga:

Te Tala Lei a Iesu ne fuli ne ia a olaga o tino i Tuvalu ke lei. I aso tau-
mua, a tino i Tuvalu e ifo ki tupua kae nofo mo olotou atua faite, kae
atamai foki i poto fakataulaitu. Te olaga faitaua mo te loto masei e
fakamasei ne ia a va o fenua mo potukau. A avaga e puke ki mafi mo
uiga pouliuli pena. A amioga mo uiga katoa kona ne avekeatea ne te
Tala Lei kae ko fou a olaga o tino; e tena te pogai e taua ei te aso
fiafia tenei.

Mea fai a tamaliki:

Lomi te ata o te vaka o Elekana kae e peipei ne galu i te matagi
malosi

Lomi te ata o Elekana mo tena Tusi Tapu i tona lima kae akoako a
tino i Nukulaelae

Fuaiupu Tauloto:

Loma 1:16(a) "I au e se ma i te Tala Lei; i te mea ko te mana o te
Atua e fakaola i ei a latou katoa e fakatuanaki."

Pese: Fili mai te tusi pese

Talosaga: Te Atua Tafasili i te Malosi, fakafetai mo olaga o au tav-
iniloto lasi kola ne kufaki ne latou a vasa mo afa kae ne fakasao ne
koe ko te mea ke maua ne matou a te Tala Lei o te Fakaolataga i a
Iesu. Fakamanuia au tavini kola e feagai mo faigataga ona ko te fola-
folaga o tau Tala Lei, amene.

ULUTALA 32: TE ASO O MATUA

Pogai: Fakamatala ki tamaliki ke maina lei i te Aso o Matua e fakama-
saua i ei a tusaga lasi kola e fai ne matua mo latou, mo te kaiga e
pela foki mo tulaga kesekeese o te olaga.

Tusi Faitau: Fataoto 31:10-31

Fakatokaga mo Faiakoga:

Te Aso Fiafia o Matua e fakamailoga i ei te tulaga mo te tusaga o matua i loto i Tuvalu ona ko te taua o tusaga e panaki mo latou kamata mai i te fale, te kaiga mo fanau, te Ekalesia, te fenua i Fale-Kaupule mo fakapotopotoga a fafine mo tulaga kesekese i te malo mo te olaga faka Tuvalu. Ne talia ne te Fono Lasi i te 1986 ke fakamailoga te Aso Tapu o Matua i te toe Aso Tapu o Iulai. Ne filigina ne fafine a te aso tenei e fakamanatu foki ei te Mafutaga a Fafine o te Ekalesia Kelisi ano Tuvalu. A fiafiaga o te Aso o Matua e tala loa ki tapuakiga i te Aso Tapu tena i te lotu taeao mo te afiafi kola e fakatoka kae takitaki ne fafine. E tenei te taimi tela e uke a meaalofa e fakatoka ne tamaliki ma olotou matua, e fakatino i ei te fakafetai a latou mo te tausiga alofa a te matua ki a latou. A tagata i te aso tenei e kuka kae fakatoka a meakai mo fakagaligali te Aso o Matua. A fakafiafiaga e fakasoko ki taupese mo koniseti i te po mo fakaala, fatele mo siva i te Aso Gafua.

Ko fakataua malosia a te tusaga faka-matua i loto i te Fenua, Ekalesia, mo te Malo; kae fakasilisili ko tusaga faka-matua tela e panaki mo te tausi, akoako, mo te putiputiake o tamaliki. Te tusaga faka-matua tena i loto i Tuvalu e se mafai o fakanafagina io me faka-tapulagina. E se gata fua i kona a tusaga o matua, kae i loto i te olaga saukatoga e lasi te tusaga fesoasoani e fai ne latou.

Mea Akoga mo fakamaina te mataupu:

Ata o matua takutakua i Tuvalu

Ata o nisi fafine takutakua i Tusi Tapu, te Pasefiika, mo te lalolagi

Fakatomuaga:

Fesili ki tamaliki taki tokotasi me se a a tena meaalofa ne fai mo tena matua i te Aso Tapu o Matua?

Akoakoga:

Ko akoako mai te muna a te Atua ki Matua me e manakogina a matua kola e fakatuagagina (f.10); e galue malosia (f.17); e kaimalie ki tino mativa mo tino fakaalofa (f.20); kae ava ki te Aliko (f.30). A te aso fiafia o Matua e fakavae ki tapuakiga ko tena uiga, a matua e tau o ola faka lagolago mo te fakatuanaki ki te Atua.

Mea fai a Tamaliki:

Kilokilo fakalei ki te ata o tou matua
Tusi ki lalao a mea gali kae lei ne fai ne ia mo koe
Tusi foki a mea kola i tau fakatau e se lei ei a tona olaga

Fuaiupu Tauloto:

Fataoto 31:30 "A te gali e fakase tino, pela foki te matagali e mafai fua o matafi, ka ko te fafine tela e fakaava ki te Aliko e tau o tavae-gina."

Pese: Fili mai te tusi pese

Talosaga:

Te motou Tamana faka te lagi, fakafetai mo omotou matua kola ne tuku mai ne koe. Te Tamana, ke tausii, ke atafai kae fakamanuia ne koe, ko te mea ke ola loa kae ol fiafia i aso koi toe o tona olaga, amene.

ULUTALA 33: TE ASO O TAMANA

Pogai: Ke akoako a tamaliki me e tasi o tiute ote tamana ko ia tela e t'aki ne ia taua fanau ki te ola se gata mai.

Tusi Faitau: Kenese 6:1—7:24; 2 Petelu 2:5 (KJV English translation)

Fakatokaga mo Faiakoga:

Te Aso o Tamana ne fakatu mo fakamailoga te taua o te tulaga o te Tamana. Te tamana ko ia kote takitaki. Ese gata fua aia se takitaki tela e 'tau o 'taki ne ia ana fanau iluga I tena olaga ke lavea ne fanau, kae ko ia se faiakoga foki te la e fakaakoako ne ia ana fanau kite mea tela e manako kiai te Atua. E uke kii a tusaga ote tamana lei tela e tasi mai iei tela ka tauloto ne taua fanau ite taimi nei me ko ia tela e taki ne ia taua fanau kite ola ese gatamai. Ite tusi ko 2 Petelu 2:5 e lavea iei ne tatou te tiute ne fai nete tamana ko Noa. Ne tala mai me ia Noa kote tokovalu o tino ne ulu ki loto ite vaka io me kote toe tino loa o ulu ki loto ite vaka ko tena uiga ne fai te tiute o te tamana tenei kote mea sose tino ioto I tena kaiga ke sao mai te faka-

salaga tela kote lolo. Aia ne seki fakavave ki loto ite vaka ko ia ke sao. Ese taumate e isi se tamaliki se fakalogo, ese fia fano ki loto ite vaka, kae ne seki fakatamala a Noa I ona tiute. E tena te tiute o sose tamana, a ia kote fakasino ala ko ia foki e fakamalosi I sose auala kite mea loa e mafai ne ia kote mea ko sose tino i lalo I tena tausiga e aofia iei ana fanau ke ulu ki loto ite vaka io me ke sao mai te fakasalaga ke maua ne latou ate ola ese gata mai.

Mea Akoga mo fakamaina te mataupu:

Ata ote vaka o Noa
Ata o Iesu

Fakatomuaga:

Fesili ki tamaliki me sea te mealofa a ia ki tena tamana kite aso o tamana.

Akoakoga:

Ko akoako mai nete muna ate Atua me ia taua tamana ko takitaki iloto I kaiga tela se tiute o koe kite fakamalosiga ki sose tino iloto ite kaiga ke iloa ne ia Iesu tela e maua ai te ola (Ioane 14:6). I te taimi o Noa kote lolo te fakasalaga ka kote auala e sao iei te tino kote vaka, taimi nei kote afi te fakasalaga ka kote auala e sao iei ko Iesu Keliso manafai koe e talitonu kae talia ne koe aia.

Mea fai a Tamaliki:

Kilokilo fakalei kite ata otou tamana
Tusi ki lalo a mea lei mo mea gali ne fai ne ia mo koe

Fuaiupu Tauloto: 2 Petelu 2:5 "...Noa kote tokovalu o tino ne ulu ki loto ite vaka..." KJV English translation

Pese: Head, Shoulders, Knees and Toes (io me fili mai te tusi pese)

Talosaga:

Te Aliko, fesoasoani mai kia matou fanau ko te mea ke iloa ne matou fanau te taua o te tusaga o te tamana

ULUTALA 34: TE ASO O TALAVOU

Pogai: Ke fakamaina ki tamaliki me i te Aso Fiafia o Talavou e fakamailoga i ei te taua o tupulaga ko te mea ke amanaiaaina kae ke fakatauaaina.

Tusi Faitau: Failauga 11:9-10:1

Fakatokaga mo Faiakoga:

Te Aso o Talavou e fakamailoga i ei te taua o tupulaga tuputupu o Tuvalu me ko latou konei ko takitaki o kaiga, fenua, malo mo lotu o te aso a taeao. Te aso e fakamasaua ki te lotu tela e masani fai i te vaia so muamua o Aokuso; ako talavou e faitusaga i tapuakiga fakapitoa i te lotu taeao mo te lotu afiafi. E fakasoko ki tau pese i te afiafi mo nisi fakafiafiaga i te Aso Gafua. E isi foki ne akoakoga fakapitoa kola e fakatoka mai ne te Mata-Galuega a Talavou i te Ulu Ofisa o Talavou o te Ekalesia Kelisiano Tuvalu mo fesoasoani ki olaga faka te agaga o talavou. E tokouke a talavou takutakua i te Tusi Tapu e pela mo te tamafine ko Luta mo tamatene ko Tavita i te Feagaiga Mua mo te soko patipole ko Petelu mo tamataene faikimua ko Timoteo i te Feagaiga Fou. A talavou fataua konei ne fai mo tino takutakua i te fakatuanaki ona ko olotou olaga ne fuli ne te talitonu o latou ki a Iesu.

Mea Akoga mo fakamaina te mataupu:

Flash cards

Video i polokalame a talavou i olotou aso fakamanatu

Fakatomuaga:

Fesili ki tamaliki me e fia a tausaga o tino kae lau a tino ki se talavou; kae fia foki a tausaga o tino e gata ei tena fai mo talavou?

Akoakoga:

Ko fakamalosiaina ne te mataupu tenei ke atafai kae alofagina a talavou i te lagona kae fakataua a olotou leo mo manatu; fakatasi mo te atiake a olotou olaga i feitu katoa tau te olaga; kae fakasilisili loa ko Olotou olaga faka te agaga. A te Talavou ka aoga malosia a tona olaga

mo tena kaiga, fenua, malo mo te lotu manafai e ola mafuta mo te Atua i taimi katoa.

Mea fai a Tamaliki:

Fesili mo tali (e fakatoka ne faiakoga a fesili)

Fuaiupu Tauloto:

Failauga 11:9 "Tupulaga tuputupu, ke fakafiafia a otou olaga i a koutou koi tupu aka. Fai te mea e lotu koutou ki ei, mo te mea e manako ki ei otou lotu. Kae masaua i te Atua e fakamasino ne ia a koutou. Amene.

Pese: Give me oil in my lamp (io me fili mai te tusi pese)

Talosaga:

Te motou Tamana, e tapu a tou igoa kae ke fai te mea e lotu koe ki ei. Fakamanuia ne koe a talavou o Tuvalu kae akoako ne koe ke tausi te fakatuanaki tela ne fakavae ne koe Iesu, Amene.